


MUTINDU WANZIO KWISAKA NA MUNU, MPE LUTUMU YA YANDI

 Mpe ya lendaka vwanda ti bampangi. . . Mu ke mona ba magnetophone mingi awa, mpe ba ke baka yawu na bande, ya kieleka. Na konso ntangu yina beno zola zaba yina Mpeve-Santu me tuba na beno, beno kwisa mona bampangi yayi awa kele na ba magnetophone yayi, bawu lenda vutukila yawu, mpe beno lenda zaba mbote yina me tadila beno. Mpe beno tala mpe mona kana ya ke salama ve mutindu Yandi tubaka yawu, beno me mona. Na ntangu beno ke wa yawu ke tuba “MUTINDU ME TUBA MFUMU, ‘Kima kingandi, to yayi ke mutindu yayi,’” to beno tala mbote mpe mona kana ya ke ya kusungama to ve. Beno me mona? Ya ke vwanda kaka mutindu yina.

² Ntangu yayi, samu na kuzwa mwa dibanza . . . Mu ke na kiese na nkokila yayi ti beto kele kaka bantu fioti awa. Beto kele kaka na kati ya dibuta, mutindu yina ve? Beto kele ve, mosi ve na kati ya beto, kele banzenza. Beto kele ve. . . Mu lunga sadila grammaire ya munu ya Kentucky mpe mu ke wa mbote mingi, samu beto ke—beto ke kaka. . . Mpe mu ke tuba mutindu yina ve samu na kutuba yimbi ya Kentucky ntangu yayi, kana ke na muntu mosi me katuka na Kentucky awa. Kele na muntu mosi me katuka na Kentucky awa? Beno telemisa maboko. Tala! Mu ke wa kaka mbote, mutindu yina ve? Ya ke mbote mingi.

³ Mama ya munu vwandaka sala na yinzo mosi ya kufutila. Mpe kilumbu mosi mu kwendaka kuna samu na kumona. . . Ya vwandaka na kimvuka mosi ya nene ya babakala yina vwandaka futila kuna, mpe kuvwandaka na mesa mosi ya nene, ya yinda kuna. Mpe mu tubaka, “Bantu yikwa awa me katuka na Kentucky, beno telema.” Bantu nionso telemaka. Mpe na nkokila yina mu kwendaka na yinzo-Nzambi, yinzo-Nzambi ya munu, mpe mu tubaka, “Bantu yikwa awa me katuka na Kentucky?” Bantu nionso telemaka. Na yawu mu tubaka, “Mbote, yina ke mbote mingi.” Bamisioni salaka kisalu mosi ya mbote, na yina beto ke vutula matondo mingi samu na yawu.

⁴ Ntangu yayi, na Buku ya ba Romain, na kapu 11 mpe na nzila ya 28. Beno wa mbote kutanga ya Disonuku.

Na kulanda nsangu ya mbote, bawu ke bambeni samu na beno: kasi na kulanda nsodolo, bawu ke bankundi ya . . . samu na batata.

Samu makabu mpe ba lubokilu ya Nzambi ba ke sobaka yawu ve.

⁵ Beto sambila. Mfumu, sadisa beto na nkokila yayi mutindu beto ke finama na yayi na luzitu nionso, na bantima ya beto ya muvimba, ya kuvedila, bima yayi me tubama samu na nkembo ya Nge kaka. Mpe sadisa munu, Mfumu, mpe tula na kati ya mabanza ya munu bima yina lendaka tubama mpe mutindu ya kutuba yawu. Kanga yinwa ya munu kana ntangu ya Nge me lunga. Mu ke lomba ti ntima ya mosi na mosi kuyamba bima yayi samu na mambote ya bambevo mpe bantu yina ke na nsatu ya kima mosi na kati ya lukutakanu yayi. Samu mu me lomba yawu na Nkumbu ya Yesu Klisto. Amen.

⁶ Ntangu yayi, mu zola kota na dilongi yayi mutindu beto kele kaka bantu fioti. Mpe—mpe mu ke baka beno ntangu ya yinda ve, mu ke tula monte le ya munu awa mpe mu ke sala nionso na kubika beno na ntangu ya mbote samu beno vutuka mbasi na nkokila. Ntangu yayi, beno sambila. Mu banza ve ti mwana ya munu ya bakala kukabulaka bakalati. Mu yufulaka yandi ve kana yandi. . . Mpe kana bawu salaka yawu ve to kana bawu salaka yawu to salaka yawu ve, ya ke diambu ve. Na mutindu nionso beto ke na bakalati awa kana beto fwana bokila yawu. Mpamba ve, kana mutindu yina ve, na yawu, beto ke tala yina Mpeve-Santu ke tuba.

⁷ Ntangu yayi, kana beno lenda wa mbote-mbote. . . Ntangu yayi, yayi lenda. . . na kutala mbote ti munu. . . Beto ke kaka bantu fioti awa, ya ke ntangu mosi ya mbote samu na kutubila mambu yayi, samu ya—ya ke diambu ya luzingu ya munu mosi. Mpe kikuma yawu yina me tanga Disonuku ya na nkokila yayi, na yawu beno lunga mona ti makabu mpe balubokilu kele kima mosi ve yina muntu lenda kuzwa na ngolo ya yandi mosi.

⁸ Paul na kutubaka awa, yandi tubaka, “Ba Juif, na kulanda Nsangu ya mbote, bawu fwaka meso mpe vwandaka ntama ya Nzambi, yina, samu na beto.” Kasi kaka nzila yina kele na ntwala ya yawu, ke tuba, “Israel nionso ke vuluka.” Israel nionso ke vuluka. Na kulanda nsodolo, Nzambi Tata zolaka bawu mpe fwaka bawu meso samu beto Bantu ya makanda lendaka kuzwa kisika ntangu yayi samu na kubalula bantima, ti, na nzila ya Abraham, Bambuma ya yandi lendaka sakumuna yinza ya muvimba na kulanda Ndinga ya Yandi. Beno me mona mutindu kimfumu ya Nzambi kele? Ndinga ya Yandi ke lungisama kaka. Yandi lenda vwanda kima yankaka ve. Mpe ntangu yayi beto, na nzila ya. . . Nzambi soolaka beto; Yandi soolaka ba Juif; mpe Yandi kele. . .

⁹ Bima yayi nionso kele luzabu ya Nzambi na ntwala. Na ntangu Yandi tubaka yina beto lenda vwanda, Yandi zabaka yawu na ntwala. Ntangu yayi, Nzambi, samu na kuvwanda Nzambi, na mbatukulu Yandi lendaka zaba nsuka kana ve Yandi lendaka vwanda Nzambi ya seko ve. Nzambi kuzola ve ti muntu mosi kuzimbana. Ve na mutindu nionso! Yandi zola ve ti muntu mosi kuzimbana. Kasi na mbatukulu ya mbatukulu ya bilumbu,

yinza, Nzambi zabaka muntu yina ke vuluka mpe muntu yina ke vuluka ve. Yandi zola ve ti bantu kuzimbana, “Ya ke luzolo ya Yandi ve ti muntu mosi kuzimbana, kasi ya ke luzolo ya Yandi ti bantu nionso kuvuluka,” kasi Yandi zabaka kubanda na mbatukulu nani lenda mpe nani lenda ve. Ya kele samu na yina Yandi lendaka tuba na ntwala, “Kima *yayi* ke salama. Kima *yina* ke salama,” to, “*Yayi* ke vwanda mutindu *yina*. Muntu *yayi* ke vwanda mutindu *yina*.” Beno me mona?

¹⁰ Yandi lungaka zaba yawu na ntwala samu Yandi ke ya seko. Kana beno zaba yina yawu zola tuba, yina zola tuba kaka ti, “kele na kima mosi ve yina Yandi zaba ve.” Beno me mona, Yandi zaba. Mbote, kele na kima mosi ve na ntwala ntangu kuvwanda, mpe na manima ntangu ke vwanda diaka ve, beno me mona, Yandi zaba kaka bima nionso. Konso kima ke na kati ya mabanza ya Yandi. Mpe mutindu Paul tubaka na ba Romain, kapu 8 mpe 9, “Na yawu samu na yinki Yandi ke ngana diaka?” Mpamba ve beto ke mona ti, kasi Nzambi. . .

¹¹ Mutindu mosi na kulonga ya Nsangu ya mbote. Muntu mosi tubaka, “Mpangi Branham, nge ke kwikila Yawu?”

Mu tubaka, “Tala.”

Yandi tubaka, “Nge fwana vwanda Calviniste.”

Mu tubaka, “Mu kele Calviniste na ntangu nionso Calvinisme ke vwanda na kati ya Biblia.”

¹² Ntangu yayi, ke na divala mosi ya Yinti, yina zola tuba Calvinisme, kasi kele diaka na mavala mingi na zulu ya Yinti, diaka. Yinti ke vwandaka kaka na divala mosi ve. Yandi zolaka landa yawu kaka tii na Lukengolo ya Seko, mpe na manima mwa ntangu fioti bawu nataka yawu na lweka ya Universalisme mpe ba me basika kisika mosi kuna, ya ke vwanda diaka na nsuka ve. Kasi na ntangu beno me kuma na nsuka ya Calvinisme, beno vutuka mpe beno banda na Arminisme. Beno tala, ke na divala yankaka na zulu ya Yinti, mpe divala yankaka na zulu ya Yinti, beno fula kaka. Nionso yina kintwadi ke sala Yinti. Na yawu mu ke kwikila na—na. . .na Calvinisme na ntangu nionso ya ke na Disonuku.

¹³ Mpe mu ke kwikila ti Nzambi zabaka na ntwala kusalama ya yinza, ya soolaka Dibuundu ya Yandi kati na Klisto, mpe fwaka Klisto na ntwala kusalama ya yinza. Disonuku me tuba mutindu yina, “Yandi vwandaka Mwana—dimeme ya Nzambi yina fwaka na ntwala kusalama ya yinza.” Beno me mona? Mpe Yesu tubaka ti Yandi zabaka beto na ntwala kusalama ya yinza, Paul tubaka ti, “Yandi—Yandi zabaka beto mpe bakaka lukanu ya kukitula beto bana na nzila ya Yesu Klisto na ntwala kusalama ya yinza.” Yina ke Nzambi. Yina ke Tata ya beto. Beno me mona?

¹⁴ Na yawu beno vwanda na boma ve, mambu nionso ke tambula mbote, konso kima ke salama kaka na ntangu na yawu. Kima mosi kaka, kele, kukota kati na kutambula ya yawu. Yawu

yina ke—yawu ke mbote, na yawu beno ke zaba yinki mutindu kusala na ntangu beno ke tambula kintwadi na yawu.

¹⁵ Ntangu yayi, beno tala mbote-mbote ntangu yayi, “Makabu mpe balubokilu ba ke sobaka yawu ve,” yina ke mutindu mosi kaka ya Masonuku mu lenda—mu lenda tula lubokilu ya munu na Mfumu. Mpe mu ke tula kivuvu ti mu ke na bankundi ya munu na nkokila yayi yina fwana bakula yayi mpe ba ke banza ve ti ya ke kima ya munu mosi, kasi samu beno bakula yawu mpe beno zaba kaka yina—yina Mfumu ke tuba ti Yandi lenda sala, mpe kumona kima mosi ke tambula mpe beno kota na yawu.

¹⁶ Ntangu yayi, na mbandukulu, kima ya ntete yina mu ke bambuka moyo kele vision. Kima ya ntete mu lunga bambuka moyo kele vision yina Mfumu pesaka munu. Mpe yina vwandaka na bamvula mingi, bamvula mingi me luta, mu vwandaka kaka mwana-bakala mosi ya fioti. Mpe mu vwandaka na ditadi mosi na diboko.

¹⁷ Ntangu yayi, beno lemvokila munu, mu lenda bambuka moyo na ntangu mu vwandaka lwata mvwela ya yinda. Mu zaba ve kana beno (na kati ya beno nionso) bambuta ke bambuka moyo na ntangu bana vwandaka lwata ba robe ya yinda. Yikwa awa ke bambuka moyo na ntangu bana vwandaka lwata, yinga, ba robe ya yinda? Mbote, mu lenda bambuka moyo, na mwa yinzo ya munu ya nkulu kuna sika wapi beto vwandaka zinga, mu vwandaka komvula na ntoto. Mpe ya vwandaka na muntu mosi, mu zaba ve nani ya vwandaka, yandi kotaka. Mpe mama tungaka mwa—mwa ruban mosi ya bleu na zulu ya robe ya munu. Mu lendaka tambula ve. Kasi mu vwandaka komvula kaka, mpe mu tulaka musapi ya munu na mvula-mpembe yina vwandaka na makulu ya yandi, mpe mu vwandaka dia mvula-mpembe yina vwandaka na zulu ya dikulu ya yandi na ntangu yandi vwandaka pene-pene ya diziku, ke yotila tiya. Mu ke bambuka moyo ti mama ya munu zangulaka munu na nswalu nionso samu na yawu.

¹⁸ Mpe kima yankaka mu ke bambuka moyo, ya fwana vwanda na manima bamvula tatu, mu vwandaka na mwa ditadi mosi ya fioti. Mpe mu vwandaka kaka na bamvula tatu, mpe leki ya munu ya bakala lendaka vwanda na bamvula zole. Mpe beto vwandaka kuna na manima ya lupangu kisika ya kupasula bankuni sika wapi bawu vwandaka nata bankuni samu na kupasula yawu. Yikwa ke bambuka moyo na ntangu yina ba vwandaka nata nkuni na manima ya lupangu samu kupasula yawu? Samu na yinki mu me lwata kalavati na nkokila yayi? Mu—mu kele na yinzo ya beto mosi na ntangu yayi awa.

¹⁹ Mpamba ve na ntangu bawu . . . Kuna na kati ya lupangu ya nkulu sika wapi ba vwandaka pasula nkuni kuvwandaka na mwa masa mosi ya fioti, yina vwandaka basika na yinto mosi. Beto vwandaka na dibungu mosi ya nkulu kuna sika wapi beto

vwandaka baka masa mpe vwandaka tiamuna yawu na kantini mosi, kantini mosi ya nkulu ya sedre, mpe vwandaka nata yawu.

²⁰ Mu ke bambuka moyo na ntangu ya nsuka mu monaka nkooko ya munu ya kento, na ntwala yandi kufwa, yandi vwandaka na bamvula nkama mosi na kumi. Mpe na ntangu yandi fwaka, mu bakaka yandi na maboko mpe mu simbaka yandi mutindu yayi kaka na ntwala yandi kufwa. Yandi tulaka maboko ya yandi pene-pene ya munu, mpe tubaka, “Nzambi sakumuna moyo ya nge, cheri, na ntangu yayi mpe seko na seko,” na ntangu yandi fwaka.

²¹ Mpe mu banza ti kento yayi vwandaka ve na basapatu ya yandi mosi, na luzingu ya yandi. Mpe mu ke bambuka moyo ti mu talaka yandi, ata mpe na ntangu mu vwandaka mwana-bakala ya ntwenia, mu vwandaka kwenda tala bawu, na basuka nionso ya vwandaka telema, makulu mwasi, mpe vwandaka kwenda na mvula-mpembe kuna na yinto, samu na kubaka kantini ya masa mpe vwandaka vutuka, makulu ya yandi na kati ya yawu. Na yawu ya lunga sala beno mpasi ve, yandi zingaka bamvula nkama mosi na kumi. Na yawu (yinga, tata) yandi vwandaka na ngolo mingi, mingi, diaka.

²² Na yawu mu ke bambuka moyo ti ya vwandaka tuba na munu disolo ya babile yina tata ya munu vwandaka sakana na yawu na ntangu yandi vwandaka mwana ya fioti. “Mpe kiboba ya mutindu yayi,” mu banzaka, “yinki mutindu ya ke sala samu na kumata na kibumbulu yina?” Yawu vwandaka mwa yinzo mosi ya fioti, na ba-chambre zole, mpe yawu vwandaka na kibumbulu mosi na zulu. Mpe bawu bakaka bitini zole ya bayinti, mpe salaka kikalu mosi, samu na kumatila kuna. Mbote, mu tubaka . . .

²³ Mbote, ntangu yayi, yandi tubaka, “Ntangu yayi, na manima ya madia ya midi mu ke tuba na nge, mu ke talisa na nge babile ya tata ya nge—ya nge.”

Mpe mu tubaka, “Mbote mingi.”

²⁴ Na yawu yandi zolaka talisa munu yawu, kuna na zulu na sanduku mosi sika wapi yandi vwandaka yidika bima ya yandi kaka mutindu biboba ke salaka. Mpe mu banzaka, “Yinki mutindu kiboba yayi ke mata na zulu ya kikalu yina?” Na yawu mu balukaka kuna mpe mu tubaka, “Nkooko,” mu tubaka, “ntangu yayi, vingila fioti, cheri, mu ke mata kuna samu na kusadisa nge.”

²⁵ Yandi tubaka, “Telema na lweka.” Yandi mataka na zulu ya kikalu yina mutindu mpadi. Yandi tubaka, “Mbote, kwisa ntangu yayi!”

Mpe mu tubaka, “Mbote mingi, Nkooko.”

26 Mu banzaka, “Oh, la la, kana mu lunga vwanda mutindu yina, mu vwanda na ngolo mingi tii na mvula nkama mosi na kumi!”

27 Ntangu yayi, mu ke bambuka moyo ti mu vwandaka na mwa yinto yina ya nkulu, mpe mu vwandaka na mwa ditadi mosi mpe mu vwandaka losa yawu kuna mutindu yayi, na kati ya potopoto, mu vwandaka meka na kutalisa na leki ya munu ya bakala mbala yikwa mu vwandaka na ngolo mingi. Mpe ya vwandaka na ndeke mosi kuna na zulu ya yinti mpe vwandaka yimbila, ke pamuka ndambu na ndambu, rouge-gorge to kima ya mutindu yina. Mpe, mwa rouge-gorge, mu banza yandi tubaka na munu. Mpe mu balukaka mpe widikilaka, mpe ndeke pamukaka mpe kwendaka, mpe Ndinga mosi tubaka, “Nge ke lutisa kitini ya nene ya luzingu ya nge pene-pene ya mbanza mosi ba ke bokila New Albany.”

28 Ya zola tuba na ba kilometres tanu sika wapi mu yelaka. Pene ya mvula na ntwala na yawu, beto kwendaka kuna, na kisika yango, beto vwandaka ve na dibanza ya kukwenda na . . . New Albany. Na luzingu ya munu ya muvimba, bima yina . . .

29 Ntangu yayi, beno tala, bantu ya dibuta ya munu vwandaka basambidi ve. Tata mpe mama ya munu vwandaka kwenda na yinzo-Nzambi ve. Na ntwala ya yina, bawu vwandaka bandimi ya Catholique.

30 Mwana-mpangi ya munu yina me vwanda awa kisika mosi kuna na nkokila yayi, mu banza, mu zaba ve. Yandi ke soda. Mu ke sambila samu na yandi. Yandi mosi ke mu-Catholique, ya ke kaka mundimi ya Catholique. Mpe mazono na nkokila, na ntangu ya vwandaka awa mpe monaka bima yina Nzambi salaka, ya vwandaka ya kutelema kuna na kisika ya malongi. Yandi tubaka, yandi vwandaka kuna, mpe yandi tubaka, “Noko Bill?” Yandi zingaka ntangu ya yinda na bayinsi ya nzenza, yandi tubaka, “Na ntangu mu monaka mambu yina . . .” Ya tubaka, “Yina—yina ke salamaka ve na dibuundu ya Catholique.” Yandi tubaka, “Ti . . . Mu—mu banza, Noko Bill, nge ke ya kusungama,” yandi tubaka.

31 Mpe na yawu mu tubaka, “Cherie, ya ke *munu* ve ke ya kusungama, ya ke Yandi yina ke ya kusungama. Beno me mona, *Yandi* yina ke ya kusungama.” Mpe na yawu yandi tubaka ti yandi . . . Mu tubaka, “Ntangu yayi, mu ke lomba na nge na kusala kima mosi ve, Melvin, kasi sadila kaka Mfumu Yesu Klisto na ntima ya nge ya muvimba. Nge lunga kwenda kisika nionso nge me zola. Kasi vwanda na kieleka na kati ya ntima ya nge ti Yesu Klisto me butuka diaka, beno me mona, na kati ya ntima ya nge. Na yawu kwenda na konso dibuundu yina nge me zola na manima ya yina.”

32 Ntangu yayi, bankooko ya munu vwandaka bantu ya Catholique. Tata ya munu ke Irlandais mpe mama ya munu

vwandaka Irlandaise. Muntu mosi kaka yina vwandaka na menga ya ba Irlandais ve, ya ke nkooko ya munu ya kento yina vwandaka Indienne Cherokee. Mama ya munu ke fioti metis. Mpe yawu yina mu. . .na munu, ya ke ya munu. . .dibuta ya beto, na manima ya mabuta tatu ya ke zimbana. Kasi yandi kaka vwandaka Irlandaise na dibuta ya muvimba, bankumbu ya bawu vwandaka Harvey na Branham. Mpe na ntwala ya yina vwandaka Lyons, yina ke kaka Irlandais. Mpe na yina bawu nionso vwandaka bandimi ya Catholique. Kasi munu mosi, na nionso ba longusaka beto nsambulu mosi ve to malongi mosi ve, ntangu beto vwandaka bana ya fioti.

³³ Kasi makabu yina, ba vision yina, mu monaka ba vision kaka mutindu mosi mu ke na yawu ntangu yayi, ya ke mbote mingi, samu makabu mpe balubokilu ba ke sobaka yawu ve. Ya ke luzabu ya Nzambi, ya ke Nzambi yina ke sala diambu. Na luzingu ya munu ya muvimba mu vwandaka na boma ya kutubila yawu.

³⁴ Beno tangaka disolo ya munu na mwa buku yina ba ke bokila *Yesu Klisto Kele Mutindu Mosi Mazono, Bubu Yayi, Mpe Kukonda Nsuka*. Mu banza ya ke na mosi ya babuku, yayi yankaka. Mutindu yina, Gene? Ya ke na yayi, na buku yina beto me mesanaka—mesanaka na yawu, na—na buku yayi beto ke na yawu na ntangu yayi? Ya ke na, *Disolo Ya Luzingu Ya Munu?* Mu banza yawu yina. Na yawu na ntangu beto vwandaka. . .Ya ke yitukisa ve? Babuku ya munu mosi, mpe mu me tangaka yawu ntete ve, munu mosi. Kasi muntu yankaka ke sonika yawu, ya ke kaka bima yina bawu ke nata na lukutakanu. Mu me zingaka yawu, na yawu mu ke vingila kaka kima yankaka kusalama. Na yawu, mpamba ve, ya ke mbote mingi, ntangu yayi mu tangaka ndambu ya yawu, awa mpe kuna, na ntangu mu zwaka ntangu ya mbote.

³⁵ Mpe ntangu yayi, na mutindu nionso, na ntangu—na ntangu mu vwandaka mwana ya fioti, beno zaba mutindu vision tubaka na munu, mu vwandaka na bamvula sambwadi, mpe tubaka, “Kunwa malafu ve to kunwa makaya ve to kutula mvindu ata fioti ve na nzutu ya nge, ke vwanda na kisalu ya kusala na nge na ntangu nge ke kuma mbuta.” Mpe beno waka mutindu yawu tubamaka na kati ya buku. Mbote, yina ke mbote. Ya lendaka salama na munu ntangu nionso.

³⁶ Na ntangu mu kumaka longi, mbote, mpamba ve yawu—mpamba ve yawu bandaka na kusalama konso ntangu.

³⁷ Mpe na mpimpa mosi mu monaka Mfumu ya beto Yesu. Mu ke tuba yayi na muswa, mu banza, ya Mpeve-Santu. Wanzio ya Mfumu yina kwisaka kele Mfumu Yesu ve. Ya me fwanana na Yandi ve. Samu, vision yina mu monaka ya Mfumu Yesu, Ya vwandaka Bakala mosi ya nzutu ya fioti. Ya vwandaka ve. . .Mu kwendaka kuna na kilanga, kusambila samu na tata ya munu.

Mpe mu vutukaka mpe kwendaka pene-pene ya mbeto, mpe mu talaka yandi na mpimpa yina mpe mu—mu tubaka, “O Nzambi, vulusa yandi!”

³⁸ Mama ya munu me vulukaka mpe mu botikaka yandi. Na yawu mu banzaka, “Oh, tata ya munu ke nwaka malafu mingi.” Mpe mu banzaka, “Kana mu lunga nata yandi na kundima Mfumu Yesu!” Mu basikaka, mpe mu lalaka kuna na mwa graba mosi ya nkulu kuna na suku ya ntwala, pene-pene ya kielo.

³⁹ Mpe Kima mosi tubaka na munu, “Telema.” Mpe mu telemaka, mu bandaka na kutambula, mpe vutukaka na kilanga yina kuna na manima ya munu, kilanga mosi ya nkulu ya matiti.

⁴⁰ Mpe kuna, kuna na ba metres tatu na munu, Bakala mosi vwandaka ya kutelema kuna; na lele ya mpembe, Muntu mosi ya nzutu ya fioti; ya vwandaka na maboko ya Yandi ya kubalula na manima mutindu *yayi*; na mandefu, ya nkufi; bansuki ya yandi vwandaka ya kubwa na zulu ya mapeka ya Yandi; mpe Yandi vwandaka tala na lweka ya munu, mutindu *yayi*; kizizi mosi ya mawete. Kasi mu lungaka bakula yawu ve, mutindu makulu ya Yandi vwandaka, mosi na manima yankaka. Mpe mupepe bulaka, robe ya Yandi vwandaka ningana, matiti vwandaka ningana.

⁴¹ Mu banzaka, “Ntangu yayi, vingila fioti.” Mu kukititikaka. Mu tubaka, “Ntangu yayi, mu ke lala ve.” Mpe mu bendaka, mu bendaka mwa kitini ya dititi, beno zaba, ya ke na cure-dent na kati. Mu tulaka yawu na yinwa ya munu. Mu talaka na lweka ya yinzo. Mu tubaka, “Ve, mu vwandaka kuna ke sambila samu na tata, mpe Kima mosi tubaka na munu ti mu kwisa awa, mpe tala Bakala yayi vwandaka kuna.”

⁴² Mu banzaka, “Ya me fwanana na Mfumu Yesu.” Mu banzaka, “Mu ke kukiyufula kana ya ke mutindu yina?” Yandi vwandaka tala kaka, kaka na lweka yina sika wapi yinzo ya beto kele na ntangu yayi. Na yawu mu balukaka na lweka *yayi* samu na kutala kana mu lunga mona Yandi. Mpe mu lungaka mona lweka ya kizizi ya Yandi mutindu yina. Kasi Yandi. . . Mu balukaka mutindu *yayi* samu na kutala Yandi. Mpe mu tubaka, “Uhm!” Yandi ninganaka ata fioti ve. Mpe mu banzaka, “Mu banzaka ti mu ke bokila Yandi.” Mpe mu tubaka, “Yesu.” Mpe na ntangu yina Yandi balukaka, Yandi balukaka mpe talaka mutindu *yayi*. Yawu yina kaka mu ke bambuka moyo, Yandi tandaka kaka maboko ya Yandi.

⁴³ Ya ke na mufikudi mosi ve na yinza yina lunga yema kizizi ya Yandi, bidimbu ya kizizi ya Yandi. Ya kulutila kitoko na nionso yina me monaka kele *Yintu ya Klisto na bamvula Makumi Tatu na Tatu* ya Hofmann, mu ke tulaka yawu na mikanda ya munu nionso mpe nionso yina mu ke sadilaka. Ya ke samu ya fwanana na yawu kaka, mpe na yawu. . . to ya ke pene-pene, pene-pene mingi na mutindu ya kulunga.

44 Ya monanaka ti, Bakala yayi, kana Yandi lendaka tuba, yinza lendaka suka, kasi ya kufuluka na zola mpe lutondo ti beno—beno. . . Mu lembaka nzutu. Mpe ntangu tongo tanaka, mu kukimonaka na suka-suka ti, simisi ya pinzama ya munu kupolaka na masa ya meso, na ntangu bumuntu ya munu vutukaka, na ntangu mu vwandaka tambula, ke vutuka na yinzo, kuna na kati ya matiti.

45 Mu tubaka yawu na longi mosi yina vwandaka nkundi ya munu. Yandi tubaka, “Billy, Yina ke kumisa nge kilawu.” Yandi tubaka, “Yina ke diabulu.” Mpe tubaka, “Kusimba ata fioti ve na bima yina.” Na ntangu yina mu vwandaka longi ya Baptiste.

46 Mbote, mu kwendaka diaka na nkundi yankaka ya nkulu. Mu vwandaka mpe tubaka na yandi mambu Yina. Mu tubaka, “Mpangi-bakala, yinki nge ke banza samu na Yawu?”

47 Yandi tubaka, “Mbote, Billy, mu ke tuba na nge.” Yandi tubaka, “Mu ke kwikila ti kana nge lunga zinga luzingu ya mbote, kulonga kaka yina ke na kati ya Biblia awa, lemvo ya Nzambi mpe nionso yina, mu lenda tula ntima ve na kima ya mpamba-mpamba, ya mutindu yina.”

48 Mu tubaka, “Tata, mu zola tula ntima ve na kima ya mpamba-mpamba ya mutindu yina.” Mu tubaka, “Kima mosi kaka mu zola zaba kele yina yawu kele.”

49 Yandi tubaka, “Billy, bamvula mingi me luta bawu vwandaka na bima yayi na kati ya mabuundu. Kasi,” yandi tubaka, “na ntangu bantumwa manaka, mambu yango sukaka na bawu.” Mpe tubaka, “Ntangu yayi kima mosi kaka beto ke na yawu ti. . . bayina nionso ke monaka bima yina,” yandi tubaka, “ya ke kinganga-nkisi, bampeve ya yimbi.”

Mu tubaka, “O Mpangi McKinney, ya kieleka?”

Yandi tubaka, “Yinga, tata.”

Mu tubaka, “O Nzambi, wila munu mawa!”

50 Mu tubaka, “Munu—munu. . . Oh, Mpangi McKinney, nge lenda—nge lenda sambila na munu samu Nzambi kubika ata fioti ve mambu yina kukumina munu? Nge zaba ti mu ke zolaka Yandi mpe mu zola vwanda na kifu ve na mambu yayi.” Mu tubaka, “Sambila na munu kintwadi.”

51 Yandi tubaka, “Mu ke sala yawu, Mpangi Billy.” Mpe beto sambilaka kuna na kati ya presbytere.

52 Mu yufulaka balongi mingi. Yawu vwandaka kaka mvutu ya mutindu mosi. Na yawu mu vwandaka na boma ya kuyufula bawu, samu bawu lendaka banza ti mu vwandaka diabulu. Mpamba ve mu—mu zola vwanda mutindu yina ve. Mu zabaka na kati ya ntima ya munu ti kima mosi salamaka. Ntangu yayi, na nionso yina, kima mosi—kima mosi salamaka na kati ya ntima ya munu. Mpe mu zolaka vwanda mutindu yina ve, ata fioti ve.

53 Na yawu bamvula mingi na ntwala, kilumbu mosi mu waka na dibuundu ya Ntete ya ba Baptiste sika wapi mu vwandaka mundimi na ntangu yina, mu waka muntu mosi ke tuba, “Tala, ya lombaka ti nge kwenda kuwa ba-exalté mazono na nkokila.”

54 Mpe mu banzaka, “Ba-exalté?” Mpe nkundi ya munu, Walt Johnson, yandi vwandaka yimba bass, mpe mu tubaka, “Yinki yina, Mpangi Walt?”

Yandi tubaka, “Nkongga ya ba Pentecotiste.”

Mu tubaka, “Yinki?”

55 Yandi tubaka, “Ba Pentecotiste!” Yandi tubaka, “Billy, kana nge me monaka yawu ntete ve,” yandi tubaka, “bawu vwandaka baluka na ntoto mutindu yina mpe ke pamuka na zulu mpe na ntoto.” Mpe tubaka, “Bawu tubaka ya lombaka ti bawu tuba-tuba kima mosi na bandinga ya malu-malu kana ve bawu—bawu me vulukaka ntete ve.”

Mpe mu tubaka, “Wapi kisika?”

56 “Oh,” yandi tubaka, “na mwa tenta yina ya nkulu, na lweka yina yankaka ya Louisville.” Yandi tubaka, “Ya ke bantu-ndombe, ya kieleka.”

Mpe mu tubaka, “Uh-huh.”

Mpe yandi tubaka, “Ya ke na mindele mingi kuna.”

Mu tubaka, “Bawu vwandaka sala mutindu yina, mpe?”

Yandi tubaka, “Yinga, yinga! Bawu vwandaka sala mutindu yina, mpe.”

57 Mu tubaka, “Ya ke yitukisa ti, bantu ke vwalangana na mambu ya mutindu yayi.” Mu tubaka, “Mbote, mu ke banza ti mambu ya mutindu yayi fwana vwanda.” Na Lumingu mosi na suka, mu ke zimbana yawu ata fioti ve. Yandi vwandaka dia mpusu ya kuyuma ya dilala samu kivumu ya yandi vwandaka mbote ve, mu ke mona yawu mutindu ti ya me salama mazono. Mpe mu banzaka, “Kutuba-tuba, kupamuka na zulu mpe na ntoto, wapi mutindu ya bansambulu ba ke vwanda na yawu na manima ya yina?” Mpe na yawu mu—mu kwendaka na ntwala.

58 Na manima ya yina, mu kutanaka na bakala mosi ya mbuta mbala yankaka yina kele awa na kati ya yinzo-Nzambi na ntangu yayi, to yina vwandaka awa na yinzo-Nzambi, na nkumbu ya John Ryan. Mpe mu kutanaka na yandi kisika mosi. . . Mbuta-muntu yayi vwandaka na mandefu mpe bansuki ya yinda, mpe mbala yankaka yandi kele awa. Mu banzaka ti yandi vwandaka muntu ya Benton Harbor ntama mingi ve awa, na Yinzo ya David.

59 Mpe bawu vwandaka na kisika mosi na Louisville. Mu vwandaka meka na kumona bantu yina, mpe bawu bokilaka yawu Lukolo ya ba Profete. Na yawu mu tubaka ti mu ke kwenda kuna samu na kumona yina yawu vwandaka. Mbote, mu monaka

muntu mosi ve ke baluka na ntoto, kasi bawu vwandaka na malongi ya ngitukulu. Mpe ya ke kisika yina mu kutanaka na bakala yayi ya mbuta, yandi bokilaka munu na yinzo ya yandi.

⁶⁰ Mu kwendaka pema. Kilumbu mosi mu vwandaka kuna, mpe mu vutukaka na yinzo ya yandi mpe yandi basikaka, mpe yandi kwendaka kisika mosi kuna na Indianapolis. Kento ya yandi, tubaka, “Mfumu bokilaka yandi.”

Mu tubaka, “Nge zola tuba ti nge ke bika bakala yina kwenda mutindu yina?”

⁶¹ Yandi tubaka, “Oh, yandi ke kisadi ya Nzambi!” Mu me wa ti, mwa kiboba yayi ya kento me katuka kufwa na mwa basabala me luta. Mpe yandi vwandaka kukipesa na yandi. Oh, la la, tala mutindu ya kento ya kukwela! Ya kieleka. Ya vwanda mbote to yimbi, yandi ke kaka ya mbote! Mu tubaka . . . Mbote, mu zabaka bawu . . .

⁶² Ntangu yayi yandi . . . Mpangi Ryan, nge kele awa? Yandi kele awa ve. Yandi vwandaka awa kilumbu yina me luta, mutindu yina ve, bampangi-babakala?

⁶³ Mbote, bawu vwandaka zingila yina bawu vwandaka kuzwa, mpe yandi vwandaka na kima ya kudia ve na yinzo. Ya kieleka. Mpe mu kangaka mwa bambisi na kiziba mosi, to na dyanga mosi, kuna na Michigan, mpe mu vutukaka—mpe mu vutukaka kuna na yinzo ya bawu. Mpe bawu vwandaka ata na mafuta ya ngulu ve na yinzo, to mafuta, samu na kulamba na yawu bambisi. Mpe mu tubaka, “Yandi bikaka nge na kima mosi ve na yinzo?”

Yandi tubaka, “Oh, yandi ke kisadi ya Nzambi, Mpangi Bill!”
Yandi tubaka, “Yandi . . .”

⁶⁴ Mpe mu banzaka, “Mbote, ntima ya nge ya nkulu kusakumuka. Mpangi-bakala, mu ke vwanda kaka na nge.” Ya kieleka. “Kana nge ke banza mambote mingi samu na bakala ya nge, mu me kubama na kuvwanda na nge mpe kusadisa nge samu na yawu.” Ya kieleka. Beto ke na nsatu ya bakento ya mutindu yina bubu yayi, mpe babakala ya kulutila mingi yina ke banza mutindu yina samu na bakento ya bawu. Ya kieleka. Amerique ke vwanda kisika ya kulutila mbote kana babakala na bakento lendaka vwanda kintwadi mutindu yina. Mbote to yimbi, beno vwanda na bawu. Kufwa makwela lendaka vwanda mingi ve.

⁶⁵ Na yawu beto—beto kwendaka na . . . Na yawu mu lutaka. Mpe na ntangu mu vwandaka vutuka na yinzo, ya vwandaka na kima mosi ya ngitukulu, mu lutaka na Mishawaka. Mpe ntangu yayi mu monaka mwa—mwa batomabilu ya nkulu, kuna na bala-bala, yina ba bokilaka . . . bawu sonikaka bisono ya nene na zulu ya yawu ti, “Yesu Kaka.” Mu banzaka, “Yinki yango . . . ‘Yesu Kaka,’ yina fwana vwanda ya basambidi.” Mpe mu pusanaka mpe monaka bavelo yina ba sonikaka, “Yesu Kaka.” Ba Cadillac,

ba Ford Model-T, mpe nionso yina, “Yesu Kaka” na zulu ya yawu. Mu banzaka, “Mbote, mu kukiyufulaka yinki yawu kele?”

⁶⁶ Na yawu mu landaka yawu pene-pene; mpe bakulaka ti, ya vwandaka na lukutakanu mosi ya basambidi, ya bantu kubanda difunda mosi na nkama tanu na mafunda zole. Mpe mu waka bantu mingi kuna ke boka mpe ke pamuka na zulu mpe na ntoto, mpe tambula. Mu banzaka, “Tala, kele awa sika wapi mu ke mona ba-exalté.”

⁶⁷ Na yawu mu vwandaka na Ford ya munu ya nkulu, beno zaba, yina mu ke tubaka ti lenda tambula ba kilometres makumi yiya na nana na ngunga mosi, kumi na tanu mutindu *yayi* mpe kumi na tanu na zulu mpe na ntoto mutindu *yayi*. Na yawu mu tulaka yawu na lweka, mu . . . na ntangu mu monaka diaka kisika ya kutula yawu, mpe mu tambulaka na makulu. Mu kotaka, mu vwandaka tala na lweka ya munu, mpe bantu nionso vwandaka ya kutelema bayina lendaka telema. Ya lombaka ti mu tala na zulu ya bayintu ya bawu. Mpe bawu vwandaka boka, mpe ke pamuka na zulu, mpe ke bwa na ntoto, mpe ke natama. Mu banzaka, “Uh, hmm, wapi mutindu ya bantu yayi!”

⁶⁸ Kasi na ntangu nionso mu vwandaka kuna, mu waka mbote mingi. Mu banzaka, “Yina ke monana mbote mingi.” Mu banzaka, “Kele na diambu mosi ya yimbi ve na bantu yina. Bawu ke bilawu ve.” Mu solulaka na bayankaka na kati ya bawu, na yawu bawu—bawu vwandaka bantu ya mbote mingi. Na yawu mu tubaka . . .

⁶⁹ Mbote, ntangu yayi, mu kwendaka na lukutakanu yina mpe vwandaka kuna mpimpa ya muvimba, mpe kilumbu yina landaka mu vutukaka. Mpe beno waka munu ke zonzila yawu na disolo ya luzingu ya munu. Mu vwandaka na kisika ya malongi na balongi nkama mosi na makumi tanu, to nkama zole, mpe mbala yankaka kulutula mingi, mpe bawu zolaka ti konso muntu kutelema mpe yandi tuba kisika yandi me katuka. Mpe mu tubaka, “Evangaliste William Branham, Jeffersonville,” mpe mu vwandaka, “Baptiste,” na yawu, mu vwandaka. Bantu nionso tubaka kisika bawu me katuka.

⁷⁰ Na yawu kilumbu yina landaka na ntangu mu kumaka kuna . . . Mu lalaka na kati ya kilanga mpimpa ya muvimba, mpe mu womaka pantalon ya munu na kutulaka yawu na kati-kati ya bakiti yina zole ya Ford, beno zaba, mpe mu—mu . . . pantalon mosi ya nkulu ya karekare, na mwa polo, beno zaba. Na yawu na suka yina landaka mu kwendaka na lukutakanu, mu lwataka mwa polo ya munu. Mu kwendaka . . .

⁷¹ Mu vwandaka kaka na ba-dollars tatu, mpe ya lombaka ti mu sumba essence mingi samu mu vutuka na yinzo. Mpe na yawu mu—mu sumbaka mwa mampa, yina ya mazono, beno zaba, kasi mu vwandaka mbote mingi. Mpe mu kwendaka na pompi ya kufwa tiya, samu na kusosa dikopa ya masa, beno zaba, mpe ya

vwandaka mbote mingi. Mpe mu lembisaka yawu fioti, mpe mu diaka madia ya suka.

⁷² Ntangu yayi, mu lendaka dia na bawu, mpamba ve, bawu vwanda dia mbala zole na kilumbu mosi. Kasi mu lendaka pesa dikabu ve, na yawu mu lendaka ve—mu lendaka ve kudia na mawa ya bawu.

⁷³ Na yawu mu—na yawu mu kumaka kuna na suka yina, bawu tubaka. . . Ya ke lomba ti mu tuba na beno kitini yayi. Mpe na ntangu mu kumaka kuna na suka yina, mpe bawu tubaka, “Beto ke sosa William Branham, evangeliste ya ntwenia yina vwanaka na kisika ya malongi mazono na nkokila, Baptiste mosi.” Bawu tubaka, “Beto zola ti yandi kwisa longa nsangu na suka yayi.” Mu monaka ti yawu vwanaka mpasi mingi samu na munu, na nkonga ya bantu yina, munu yayi ke Baptiste. Na yawu mu kukizindisaka na kiti ya munu. Mu vwanaka na pantalon ya kilo ya karekare na polo; beno zaba, mpe beto vwanaka lwata bilele ya banganga-Nzambi, mpamba ve. . . Mpe mu vwanaka na kiti kuna na manima mutindu yayi. Na yawu bawu yufulaka mbala zole to tatu. Mpe mu vwanaka na lweka ya mpangi-bakala mosi ya ndombe.

⁷⁴ Mpe kikuma bawu vwanaka na lukutakanu ya bawu na Nord, ya ke samu nkabisa vwanaka kuna na Sud. Na yawu bawu lendaka sala yawu ve na Sud.

⁷⁵ Na yawu mu kukiyufulaka yinki yayi “Yesu Kaka” zolaka tuba. Mpe mu banzaka, “Mutindu ya ke samu na Yesu, ya ke mbote mingi. Na yawu mu ke sala luswaswanu mosi ve na mutindu ya ke. . . na mutindu ya ke, kaka samu na Yandi.”

⁷⁶ Na yawu mu vwanaka fioti kuna mpe mu vwanaka tala bawu, mpe na yawu bawu bokilaka diaka mbala zole to tatu. Mpe mpangi-bakala yayi ya ndombe talaka munu, yandi tubaka, “Nge zaba yandi?” Munu—munu—munu. . . Ya vwanaka mpasi mingi kuna. Mu lendaka tuba luvunu ve na bakala yina, mu lendaka sala yawu ve.

Mu tubaka, “Tala, mpangi-bakala. Yinga, mu zaba yandi.”

Yandi tubaka, “Mbote, kwenda sosa yandi.”

⁷⁷ Mu tubaka, “Mbote, mu—mu ke tuba na nge, mpangi-bakala,” mu tubaka, “munu yayi. Kasi, nge me mona,” mu tubaka, “tala, munu. . . na pantalon yayi ya kilo ya karekare.”

“Mata kuna.”

⁷⁸ Mpe mu tubaka, “Ve, mu lunga mata kuna ve,” mu tubaka, “na pantalon ya kilo ya karekare, mutindu yayi, na mwa polo yayi.”

Yandi tubaka, “Bantu ke tala ve mutindu nge me lwata.”

⁷⁹ Mpe mu tubaka, “Mbote, tala, kutuba ve kisika mu kele. Nge me wa?” Mu tubaka, “Tala, mu me lwata pantalon yayi ya kilo ya karekare, mu zola mata kuna ve.”

Bawu tubaka, “Muntu mosi zaba kisika William Branham kele?”

Yandi tubaka, “Yandi yayi! Yandi yayi!”

⁸⁰ Oh, la la! Kizizi ya munu kumaka mbwaki, beno zaba; mpe mu vwandaka na kalavati ve, beno zaba; mpe na mwa polo yayi ya nkulu, beno zaba, na maboko ya nkufi. Mpe mu mataka kuna, mpe makutu ya munu vwandaka sala mpasi. Mu me telemaka ata fioti ve pene-pene ya micro.

⁸¹ Mpe na yawu mu longaka kuna, mpe mu bakaka dilongi mosi, mu ke zimbana yawu ata fioti ve, “Mvwama yina zangulaka meso ya yandi na zulu kuna na difelo, mpe yandi dilaka.” Munu, na bambala mingi, mu ke vutukilaka bampova yayi tatu mumbandu, “Beni kwisa, tala bakala mosi,” “Nge me kwikila yawu?” to “Na yawu yandi dilaka.” Mpe mu vwandaka tuba kaka, “Kele na bafelele ve, mpe na yawu yandi dilaka. Kele na balukutakanu ya bisambu ve, na yawu yandi dilaka. Kele na bana ve, na yawu yandi dilaka. Kele na mikunga ve, mpe na yawu yandi dilaka.” Na yawu mu dilaka.

⁸² Na yawu na ntangu yawu manaka, na yina, oh, la la, bawu... bawu nionso vwandaka pene-pene ya munu, bawu zolaka ti mu kwenda sala lukutakanu mosi na bawu. Mpe mu banzaka, “Tala, mbala yankaka mu ke exalté mosi!” Beni me mona? Na yawu mu banzaka, “Mbala yankaka...” Beni me mona, bawu vwandaka bantu ya mbote.

⁸³ Mpe mu basikaka kuna na nganda. Bakala mosi yina lwataka basapatu mosi ya yinda ya mivungi ya bangombe, na yimpu ya nene ya mivungi ya bangombe, mu tubaka, “Nge ke nani?”

Yandi tubaka, “Mu kele Mbuta *Kingandi* ya Texas.”

Mu banzaka, “Mbote, yina ke monana...”

⁸⁴ Bakala yankaka kwisaka kuna na pantalon ya golf, beno zaba, yina ba vwandaka sala na yawu bansaka ya golf, mpe mosi ya bawu vwandaka na triko ya jersey. Yandi tubaka, “Mu ke Reverend *Kingandi* ya Florida. Nge ke sepela kukwisa...”

⁸⁵ Mu banzaka, “Mu ke wa mbote, nkundi, na pantalon yayi ya kilo ya karekare na polo yayi. Ya ke mbote.”

⁸⁶ Na yawu, beno waka mambu yina na disolo ya luzingu ya munu, mpamba ve mu ke telema awa mpe mu ke tuba na beno kima yina mu me tubaka ntete ve. Kima ya ntete, mu zola yufula beno... Mu vwandaka ve na dibanza ya kutubila yawu. Mu me tubaka yawu ata fioti ve na ntuala ya bantu mingi, na luzingu ya munu. Kana beno ke sila na munu ti beno ke zola munu mpe ke meka kuzola munu kaka mutindu mosi beno zolaka munu na ntuala mu ke tuba yawu, beno telemisa maboko ya beno. Mbote mingi. Yina ke nsilulu ya beno, mu ke kanga beno na yawu.

⁸⁷ Na ntangu mu vwandaka kuna na lukutakanu na nkokila yina, na ntangu bawu zolaka yimbila mikunga ya bawu

mpe ke bawu vwandaka bula maboko ya bawu. Mpe bawu yimbilaka, “Munu. . .” Mwa mukunga yina, “Mu zaba ti yawu vwandaka Menga. Mu zaba ti yawu vwandaka Menga.” Mpe bawu vwandaka baka mbangu na kati ya bandonga, mpe nionso yina, mpe vwandaka boka mpe ke kembisa Mfumu. Mu banzaka, “Yina ke wakana mbote mingi samu na munu.” Mu bandaka. . .

⁸⁸ Mpe bawu vwandaka talisa kaka na Actes, na Actes 2:4, Actes 2:38, Actes 10:49, nionso yina. Mu banzaka, “Tala, yina ke Masonuku! Mu me monaka Yawu ata fioti ve.” Kasi, oh, ntima ya munu vwandaka zika, mu banzaka, “Yayi ke mbote mingi!” Mu banzaka ti bawu vwandaka nkonga ya ba-exalté na ntangu mu kutanaka na bawu na mbala ya ntete, mpe mu banzaka ti, “Oh, la la! Ntangu yayi bawu ke nkonga ya bawanzio.” Beno me mona, mu sobaka mabanza ya munu na nswalu nionso.

⁸⁹ Na yawu na suka yina landaka na ntangu Mfumu pesaka munu siansi yayi ya nene ya kusimbisa ba lukutakanu yayi, mu banzaka, “Oh, la la, mu ke vwanda na nkonga ya bantu yayi! Yina lendaka vwanda mutindu ya bantu yina ba vwandaka bokila ‘ba Methodiste yina ke bokaka.’ Bawu kwendaka fioti ntama,” mu banzaka. “Mbala yankaka ya ke bawu.” Na yawu mu banzaka, “Mbote, mu ke. . . Mu ke ndima mutindu yina. Oh, bawu ke na kima mosi mu ke sepelaka na yawu, bawu ke ya kukikulumusasa mpe na mawete.”

⁹⁰ Na yawu kima mosi kaka mu lendaka bakula ve vwandaka kutuba na bandinga ya malu-malu yina, yina vwandaka yitukisa munu. Mpe munu. . . Bakala mosi vwandaka kuna, beto tuba, ya vwandaka *awa* mpe yankaka *kuna*, bawu vwandaka bantwadisi ya kimvuka. Mosi *yayi* lendaka telema mpe kutuba na bandinga ya malu-malu, *yayi* lendaka tendula yawu mpe lendaka tuba mambu yina me tala lukutakanu mpe nionso yina. Mu banzaka, “Oh, la la, uh, mu fwana tanga yawu!” Na yayi mpe yina, yawu kulumukaka na *yayi* mpe na manima yawu vutukaka na *yina*; mpe mosi na mosi lendaka tuba na bandinga ya malu-malu, mpe kutendula yawu. Bayankaka kati na yinzo-Nzambi lendaka tuba, kasi ntendulu vwandaka ya kufwanana ve na babakala zole yayi. Ntangu yayi, mu monaka ti bawu vwandaka mosi pene-pene na yankaka, mu banzaka, “Oh, la la, bawu fwana vwanda Bawanzio!” Na yawu na ntangu bawu vwandaka kuna na manima. . .

⁹¹ Ata mpe ya vwandaka (beno zaba) yina mu lendaka bakula ve, Yawu vwandaka kwisa na zulu ya munu. Mpe mu ke na mutindu ya kuzaba mambu kana Mfumu zola ti mu zaba yawu, beno zaba. Mpe mu zola ve. . . Kikuma yawu yina mu ke tuba ti mu ke tubaka yawu na muntu mosi ve, ata fioti ve na ntwala ya bantu nionso. Kana mu zola zaba kima mosi, Mfumu ke tuba na munu ntangu nionso mambu yango. Yawu yina kikuma ya dikabu, beno me mona. Na yawu beno lunga losa yawu ve na ntwala ya bantu, yina ke monana mutindu kulosa bima ya nge

ya mfunu na ntwala ya bangulu. Ya ke kima mosi ya busantu, kima ya santu, mpe beno zola sala mutindu yina ve. Na yawu, mu ke pesa mvutu na Nzambi. Mumbandu kutuba na bampangi mpe nionso yina, mu lenda meka ve kumona kima mosi ya yimbi samu na mpangi mosi ya bakala.

⁹² Kilumbu mosi mu vwandaka na mesa na bakala mosi, yandi tulaka diboko ya yandi na mapeka ya munu, yandi tubaka, “O Mpangi Branham, mu ke zolaka nge.” Mpe mu vwandaka wa kima mosi ke ningana. Mu talaka yandi. Yandi lendaka tuba na munu mutindu yina ve; mu zabaka ti yandi vwandaka zola munu ve, beno me mona, samu yawu vwandaka pwelele. Ya kieleka yandi vwandaka muntu ya luvunu, kana ya vwandaka na mosi ve kuna, beno me mona, mpe yandi vwandaka kaka na maboko ya yandi na zulu ya mapeka ya munu.

⁹³ Mu tubaka, “Mbote, mambu ve,” mu katukaka kuna. Mu zola zaba yawu ve. Mu zola zaba yandi kaka na mutindu mu zaba yandi, mutindu mpangi-bakala, mpe yimeni. Bikwa Nzambi kusala yina yankaka. Beno me mona? Mpe mu zola ve ku . . . mu zaba ve, mu ke zolaka ve kuzaba mambu yina.

⁹⁴ Mpe bambala mingi samu na mambu yayi, ya ke salamaka ve awa na kati ya yinzo-Nzambi. Na ntangu mu me vwanda na yinzo mosi, me vwanda na restaurant, mpe Mpeve-Santu ke tuba na munu mambu yina ke salama. Kele na bantu awa yina zaba ti yina ke kieleka. Mu ke vwanda na yinzo ya munu mpe mu ke tuba, “Ntangu yayi, beno sala keba, ditoma mosi ke kwisa kuna na mwa ntangu fioti. Ya ke vwanda na muntu *kingandi mpe kapanda*. Beno kotisa bawu, samu Mfumu me tuba ti bawu ke vwanda awa.” “Na ntangu beto ke kwenda na nzila, kima *yina* ke salama. Sala keba na mapambu ya banzila kuna, samu ditoma mosi ke tuta nge.” Mpe mu ke tala kaka kana ya ke vwanda mutindu yina ve, beno me mona, konso ntangu, ya ke kaka ya kulunga! Na yawu kuzola ve kukikotisa mingi na yawu nge mosi, samu nge ke . . . Yawu—yawu ke . . . Beno lunga yala yawu ve, ya ke dikabu ya Nzambi, kasi beno fwana sala keba na yina beno ke sala na yawu. Beno ke pesa mvutu na Nzambi.

⁹⁵ Beno tala Moise. Moise vwandaka muntu yina Nzambi tindaka. Beno ke kwikila yawu? Yina zabanaka na ntwala, kubamaka na ntwala, mpe salamaka profete! Mpe Nzambi tumaka yandi kuna, mpe tubaka, “Kwenda tuba na ditadi,” na manima ya kubula yawu. Yandi tubaka, “Kwenda tuba na ditadi, mpe ya ke basisa bamasa ya yawu.”

⁹⁶ Kasi Moise, na makasi, yandi kwendaka kuna mpe bulaka ditadi. Masa basikaka ve, yandi bulaka yawu diaka, mpe tubaka, “Beni bimpumbulu! Ya ke na ditadi yayi beto ke basisila beno masa?”

⁹⁷ Beno ke mona yina Nzambi salaka? Masa basikaka, kasi tubaka, “Mata awa, Moise.” Yina vwandaka nsuka na yawu,

beno me mona. Beno fwana sala keba na bima yina, mpamba ve beno . . . yina beno ke sala na makabu ya Nzambi.

⁹⁸ Kaka mutindu longi mosi, longi mosi ya mbote ya kikesa, mpe yina ke kwenda longa kaka samu na kubaka makabu mpe mbongo, yandi ke pesa mvutu na Nzambi samu na yawu. Ya kieleka. Beno fwana sala keba na yina beno ke sala na makabu ya Nzambi. Mpe, to kumeka kupesa lukumu ya nene to kuzabana ya dibuundu mosi, to samu na kuzabana ya yandi mosi. Mbote mu ke zola kuvwanda na bankokila zole to tatu ya lukutakanu mpe kukwenda kisika yankaka, mpe kukikulumusasa, mpe kubikala muntu ya kuvedila. Mpe beno zaba yina mu zola tuba. Yinga, tata, beno bikala ntangu nionso na kisika ya beno sika wapi Nzambi lenda tula diboko ya Yandi na zulu ya beno.

Yayi me tala Luzingu ya kati ntangu yayi, beno bambuka moyo.

⁹⁹ Na yawu kilumbu yango, mu banzaka, “Mbote, mu ke pusana pene-pene ya bawu.” Mpe mu vwandaka na boma mingi na ntwala ya bantu yina, mu banzaka, “Mu ke zaba diambu ya bantu yayi.” Mpe mu vwandaka sosa bawu kuna na nganda na nsuka ya lukutakanu. Mu talaka bisika nionso. Mu monaka mosi ya bawu, mu tubaka, “Mbote na nge, tata?”

¹⁰⁰ Yandi tubaka, “Mbote na nge!” Yandi tubaka, “Nge ke longi ya ntwenia yina longaka na suka yayi?”

Mu tubaka . . . Mu vwandaka na bamvula makumi zole na tatu na ntangu yina. Mu tubaka, “Yinga, tata.”

Mpe yandi tubaka, “Nkumbu ya nge kele nani?”

Mu tubaka, “Branham.” Mpe mu tubaka, “Ya nge?”

¹⁰¹ Mpe yandi tubaka na munu nkumbu ya yandi. Mpe mu banzaka, “Mbote, ntangu yayi, kana mu lunga kota na ngwisani na mpeve ya yandi na ntangu yayi.” Mpe mu vwandaka zaba ve yina vwandaka sala yawu. Mpe mu tubaka, “Mbote, tata, tata,” mu tubaka, “beno awa kele na Kima mosi yina mu ke na yawu ve.”

Yandi tubaka, “Nge kuzwaka Mpeve-Santu na ntangu nge kwikilaka?”

Mu tubaka, “Mbote, mu kele Baptiste.”

¹⁰² Yandi tubaka, “Kasi nge kuzwaka Mpeve-Santu na ntangu nge kwikilaka?”

¹⁰³ Mpe mu tubaka, “Mbote, mpangi-bakala, yinki nge zola tuba?” Mu tubaka, “Mu—mu ke kondwa yina nionso beno ke na yawu, mu zaba yawu!” Mu tubaka, “Samu beno kele na Kima yina ke monana ya ngolo mingi mpe na yawu . . .”

Yandi tubaka, “Nge me tubaka ntete ve na bandinga ya malu-malu?”

Mpe mu tubaka, “Ve, tata.”

Yandi tubaka, “Mu ke tuba na nge sesepi yayi ti nge ke na Mpeve-Santu ve.”

104 Mpe mu tubaka, “Mbote, kana mu . . . Kana yawu yina ke sala ti muntu kuzwa Mpeve-Santu, mu ke na Yawu ve.”

105 Mpe na yawu yandi tubaka, “Mbote, kana nge me tubaka ntete ve na bandinga ya malu-malu, nge ke na Yawu ve.”

106 Mpe mu fulaka kaka masolo na yandi mutindu yina, mu tubaka, “Mbote, wapi sika mu lunga kuzwa Yawu?”

107 Yandi tubaka, “Kota na yinzo yina kuna mpe banda kusosa Mpeve-Santu.”

108 Mpe mu vwandaka tala yandi kaka, beno zaba. Yandi zabaka ve yina mu vwandaka sala, kasi yandi . . . Mu zabaka ti yandi vwandaka na mwa nsatu mosi ya luswaswanu, samu yandi . . . meso ya yandi bandaka na kulemba fioti na ntangu yandi vwandaka tala munu. Mpe yandi . . . Kasi yandi vwandaka Muklisto ya kieleka. Ya kieleka, nkama na zulu ya nkama, yandi vwandaka Muklisto. Ya kieleka. Mbote, mu banzaka, “Nzambi kubaka lukumu, Yawu yayi! Mu—mu fwana—mu fwana kwenda na autel kisika mosi kuna.”

109 Mu basikaka, mu talaka bisika nionso, mu banzaka, “Mu ke sosa muntu yankaka.” Mpe na ntangu mu monaka yandi mpe bandaka na kusolula na yandi, yandi tubaka, “Mbote na nge, tata?”

110 Yandi tubaka, “Tala, yinki kele dibuundu ya nge?” Yandi tubaka, “Bawu tubaka na munu ti nge kele Baptiste.”

Mu tubaka, “Yinga.”

Mpe yandi tubaka, “Nge me yambaka ntete Mpeve-Santu ve, ya kieleka?”

Mu tubaka, “Mbote, mu zaba ve.”

Yandi tubaka, “Nge me tubaka ntete na bandinga ya malu-malu?”

Mu tubaka, “Ve, tata.”

Yandi tubaka, “Nge ke na Yawu ve.”

111 Mpe mu tubaka, “Mbote, mu zaba ti mu ke kondwa yina beno ke na yawu. Mu zaba yawu.” Mpe mu tubaka, “Kasi, mpangi ya munu, ya kieleka mu ke na nsatu ya Yawu.”

Yandi tubaka, “Mbote, kele na—kele na kiziba ya masa kuna, me kubama.”

112 Mu tubaka, “Mu me botamaka dezia. Kasi,” mu tubaka, “mu—mu me zwaka ntete ve yina beno ke na yawu.” Mu tubaka, “Ya kieleka beno ke na kima yina mu—mu ke na yawu ve.”

Mpe yandi tubaka, “Mbote, yina ke mbote.”

113 Mu vwandaka meka na kukanga yandi, beno me mona. Mpe kana mu . . . Na ntangu mu kangaka mpeve ya yandi, ntangu

yayi, yina vwandaka bakala yankaka, kana mu me solulaka ntete ve na muntu ya luvunu, yina vwandaka mosi ya bawu. Yandi vwandaka zinga. . . Kento ya yandi vwandaka na bansuki ya ndombe, yandi vwandaka zinga na kento ya bansuki ya mwamba mpe butaka na yandi bana zole. Yandi vwandaka nwa malafu, ke zenga ndefi, ke kwenda na ba bar, mpe nionso yina, mpe kasi kuna ya vwandaka tuba na bandinga ya malu-malu mpe ke pesa profesu.

114 Na yawu mu tubaka, “Mfumu, lemvokila munu.” Mu vutukaka na yinzo. Ya kieleka. Mu tubaka, “Mu ke kaka. . . Mu ke bakula yawu ve. Yawu monanaka ti Mpeve-Santu ya lusakumunu kulumukaka, mpe, na zulu ya muntu yina ya luvunu.” Mu tubaka, “Yawu lunga salama ve! Yimeni.”

115 Na ntangu yayi ya yinda landaka, mu vwandaka longuka mpe ke dila, mu banzaka ti kana mu lendaka kwenda na bawu mbala yankaka mu ke zaba diambu yango. Mosi yayi, Muklisto ya kisina; mpe yina yankaka, muntu ya luvunu ya kieleka. Na yawu mu banzaka, “Yinki yawu kele? Oh,” mu tubaka, “Nzambi, mbala yankaka—mbala yankaka kele na kima mosi ke tambula mbote ve na munu.” Mpe mu tubaka, na mutindu mu ke muntu ya misiku, “Yina ke. . . ya ke lomba ti mu mona yawu na kati ya Biblia. Ya fwana vwanda.”

116 Samu na munu, bima nionso yina ke salama fwana basika na Biblia yayi to yawu kele ya kusungama ve. Yawu fwana basika kaka Awa. Yawu lunga ndimisama na kati ya Biblia, na kisika mosi kaka ve, kasi ya fwana vwanda kaka na Biblia ya muvimba. Mu fwana kwikila yawu. Yawu fwana vukana mpe kuwisana na Masonuku nionso to mu ke kwikila yawu ve. Mpe na yawu, samu Paul tubaka, “Kana wanzio mosi me katuka na Zulu, yandi zabisa beno nsangu ya kuswaswana, bika ti yandi singama.” Na yawu mu ke kwikilaka na Biblia.

Mpe mu tubaka, “Mu lendaka mona ata fioti ve kima ya mutindu yina na kati ya Biblia.”

117 Na manima bamvula zole, na manima lufwa ya kento ya munu mpe nionso yina, mu vwandaka kuna na Green’s Mill, mwa kisika ya munu ya nkulu kuna, mu vwandaka sambila. Mu vwandaka kuna na caverne ya munu bilumbu zole to tatu, ya vwandaka bilumbu zole. Mu kwendaka kuna samu na kubaka fioti mupepe, mwa mupepe. Mpe na ntangu mu kwendaka kuna, Biblia ya munu vwandaka kuna na zulu ya kitini ya yinti kaka na kukota. Mupepe bwisaka yinti mosi ya nkulu, yina vwandaka na mavala mingi. Ntangu yayi, beno. . . Ya vwandaka na divala mosi na zulu ya yawu mutindu *yayi*, mpe yinti vwandaka na ntoto. Mpe mu vwandaka na zulu ya kitini ya yinti yina makulu ndambu na ndambu, mpe mu lalaka kuna na mpimpa, ke tala na zulu mutindu yayi, diboko ya munu vwandaka na zulu mutindu *yayi*, na bantangu yankaka mu vwandaka lala na zulu ya kitini

ya yinti yina, ke sambila. Mu vwandaka kuna na zulu bilumbu mingi, ke dia ve to ke nwa ve, mu vwandaka kuna ke sambila. Mpe mu kwendaka kuna samu na kubaka mwa mupepe ya mbote, na caverne yina kuna; ya vwandaka na mupepe ya mbote, na madidi ya mbote kuna na kati.

¹¹⁸ Na yawu mu basikaka mpe Biblia ya munu vwandaka kuna sika wapi mu tulaka Yawu mazono, mpe ya vwandaka ya kuzibuka na ba Hebreux, na kapu 6. Mpe mu bandaka na kutanga kuna, “Beto katula . . . tii na . . . beto luta na yina kele ya kulunga, beto bika ntete kutula fondasio yankaka ya kubalula ntima mpe bisalu ya kufwa mpe ya lukwikilu na Nzambi,” mpe nionso yina. “Samu ya ke mpasi samu na bayina kuzwaka nsemo, vukanaka na dikabu ya zulu, mpe balubokilu,” mpe nionso yina. Kasi ya tubaka, “Kasi bansende mpe matiti ya bansende yina me kubama na kulosama, yina ke suka . . . masa . . . mvula ke nokaka na zulu ya ntoto samu na kukubika yawu mpe kuyidika yawu samu na yina—na yina ke losama, na bansende mpe matiti ya bansende, yina ke suka na tiya.”

Mpe Kima mosi salaka, “Wuuuussssh!”

¹¹⁹ Mu tubaka, “Yawu yayi. Mu ke wa ntangu yayi nionso yina Yandi . . . Yandi vumbulaka munu awa, ntangu yayi Yandi zola pesa munu vision mosi.” Mu vingilaka kuna na nsuka ya kitini ya yinti yina, mpe mu vingilaka. Mu vumbukaka mpe mu tambulaka ndambu na ndambu, mu mataka mpe kulumukaka. Mu vutukaka na manima, kima mosi ve salamaka. Mu vutukaka diaka kuna na caverne, kima mosi ve salamaka. Mu telemaka kuna, mu tubaka, “Mbote, yinki diambu yayi?”

¹²⁰ Mu vutukaka diaka kisika Biblia ya munu vwandaka, mpe, oh, Yawu kwisaka diaka na munu. Mu bakaka Yawu, mpe mu tubaka, “Yinki ke kuna na kati yina Yandi zola ti mu tanga?” Mu vwandaka tanga kaka “kubalula bantima na Nzambi, mpe lukwikilu,” mpe nionso yina, mpe mu tangaka kuna sika wapi Yawu tubaka, “Mvula ke nokaka na zulu ya ntoto samu na kukubika yawu mpe kuyidika yawu na kisal ya yawu, samu awa, kasi bansende mpe matiti ya bansende yina ke losama mpe ke yokama na tiya.” Mpe, oh, Yawu ningisaka munu!

¹²¹ Mpe mu tubaka, “Mfumumu, Nge ke pesa munu vision ya yina . . .” Mu vwandaka kuna na zulu samu na kulomba Yandi kima yankaka.

¹²² Na yawu na mbala mosi, na ntwala ya munu, mu monaka yinza ke baluka, mpe nionso vwandaka ya kubundula. Mpe kuna bakala mosi lutaka na bilele ya mpembe, na yintu ya yandi na zulu, ke mwanga Bambuma mutindu yayi. Mpe na ntangu yandi kwendaka, awa kwisaka, na mutindu yandi vwandaka zimbana na manima ya mongo, muntu mosi kwisaka na manima ya yandi awa, na bilele ya ndombe, na yintu ya yandi ya kukulumusa, yandi vwandaka kuna bambuma. Mpe na ntangu Bambuma

ya mbote basikaka, yawu vwandaka masangu; mpe na ntangu bambuma ya yimbi basikaka, yawu vwandaka matiti ya yimbi.

¹²³ Mpe na manima ya yawu kukawuka ya nene kwisaka na zulu ya ntoto, mpe disangu kulumusaka yintu ya yandi, ya vwandaka pene-pene ya lufwa, ya vwandaka na nsatu ya masa. Mpe mu monaka bantu nionso na maboko ya bawu na zulu, ke sambila Nzambi samu na kutinda masa. Mpe na manima mu monaka matiti ya yimbi, ya kulumusaka yintu ya yandi, ya vwandaka na nsatu ya masa. Mpe kaka na ntangu yina matuti ya nene kwisaka mpe mvula ya ngolo nokaka. Mpe kaka na ntangu yina, mwa disangu yina kulumusaka yintu salaka, “Wish,” ya telemisaka yintu. Mpe mwa dititi ya yimbi yina vwandaka pene-pene na yawu salaka, “Wish,” ya telemisaka yintu.

Mu tubaka, “Mbote, yinki diambu yayi?”

¹²⁴ Na yina Yawu kwisaka na mabanza ya munu. Yawu yina. Mvula yina mosi salaka ti masangu kuyela, yawu salaka diaka ti matiti ya yimbi kuyela. Mpe Mpeve-Santu yina mosi lunga kulumuka na kati ya nkonga ya bantu, mpe lunga sakumuna muntu ya luvunu kaka mutindu mosi Yawu ke sakumuna yankaka. Yesu tubaka, “Beno ke zaba bawu na bambuma ya bawu.” Kana yandi boka ve, to kana yandi sepela ve, kasi “beno ke zaba yandi na mbuma ya yandi.”

¹²⁵ Mu tubaka, “Yawu yina!” “Mu me bakula, Mfumu.” Mu tubaka, “Na yawu yina ke Kieleka.” Bakala yayi. . . Beno lenda vwanda na makabu kukondwa kuzaba Nzambi.

¹²⁶ Mpe na yawu mu—na yawu mu kumaka na ntembe mingi samu na bandinga ya malu-malu, beno me mona. Kasi kilumbu mosi, na yawu, Nzambi siamisaka yawu na munu!

¹²⁷ Mu vwandaka botika kuna na nzadi, bandimi ya munu ya ntete, na Nzadi Ohio, mpe mu vwandaka botika muntu ya kumi na sambwadi, kaka na ntangu mu bandaka na kubotika yandi, mu tubaka, “Tata, mutindu mu ke botika yandi na masa, Nge botika yandi na Mpeve-Santu.” Mu bandaka na ku—kuzindisa yandi na masa.

¹²⁸ Mpe kaka na ntangu yina kitembo mosi ya ngolo katukaka na zulu, mpe awa kwisaka Nsemo yina, yawu kulumukaka. Bankama na bankama ya bantu vwandaka na lweka ya nzadi, kaka na ngunga ya zole na manima ya midi, na Ngonda ya sambanu. Mpe Yawu telemaka na zulu sika wapi mu vwandaka. Ndinga mosi tubaka kuna, mpe tubaka, “Mutindu ba tindaka Jean Baptiste na kukwisa na ntwala ya kwizulu ya ntete ya Klisto, nge ke . . . nge ke na Nsangu yina ke kwisa na ntwala ya Kwizulu ya Zole ya Klisto.” Mpe mu zolaka fwa na boma.

¹²⁹ Mpe mu vutukaka, mpe bantu nionso kuna, misadi na kompani ya bisengo mpe bawu nionso, misadi na kompani ya bankisi, mpe bawu nionso vwandaka kuna na lweka ya nzadi. Mu botikaka bantu pene-pene ya nkama zole to tatu na manima

135 Mpe mu tubaka . . . mu kumaka pene-pene ya yinzo mpe mu vwandaka katula mukaba ya munu, mukaba ya munduki ya munu mpe bima nionso, mpe mu vwandaka gumba maboko ya simisi ya munu. Beto vwandaka zinga na mwa yinzo ya fioti ya bitini zole, mpe muzola sukula mpe kukubama samu na kudia. Mpe mu sukulaka, mpe mu vwanda tambula kaka na lweka ya yinzo, na nsi ya yinti ya nene ya erable, mpe na mbala mosi Kima mosi salaka, “Wuuuussssh!” Mpe mu kumaka pene ya kubwa ngambu. Mpe mu talaka, mpe mu zabaka ti ya vwandaka Yawu diaka.

136 Mu vwandaka na zulu ya bidiatilu yina, mpe yandi kitaka na tomabilu ya yandi mpe kwisaka mbangu na munu, yandi tubaka, “Billy, nge ke bwa ngambu?”

Mu tubaka, “Ve, tata.”

Yandi tubaka, “Yinki diambu, Billy?”

137 Mpe mu tubaka, “Mu zaba ve.” Mu tubaka, “Nge lunga kwenda, mpangi-bakala, ya ke mbote mingi. Matondo na nge.”

138 Kento ya munu kwisaka mpe nataka mbidika ya masa, yandi tubaka, “Cheri, yinki ke diambu?”

Mu tubaka, “Kima ve, cherie ya munu.”

139 Na yina yandi tubaka, “Kwisa ntangu yayi, madia me kubama,” mpe yandi ziungisaka diboko ya yandi pene-pene ya munu, yandi mekaka kukotisa munu.

140 Mu tubaka, “Cherie, mu—mu zola tuba na nge kima mosi.” Mu tubaka, “Bokila bawu mpe tuba na bawu ti mu ke vwanda kuna ve na manima ya midi yayi.” Mu tubaka, “Meda, cherie ya munu,” mu tubaka, “mu zaba ti mu zola Yesu Klisto na kati ya ntima ya munu. Mu zaba ti mu me katuka na lufwa tii na Luzingu. Kasi mu zola ve ti diabulu kusala kima mosi na munu.” Mpe mu tubaka, “Mu lenda fula mutindu yayi ve; mu ke muntu ya boloko.” Mu tubaka, “Konso ntangu, kima yayi ke salama ntangu nionso, mambu ya mutindu yina, mpe ba vision yayi ke kwisa, mpe nionso yina. To, nionso yin aya lunga vwanda,” mu tubaka, “ya ke salama na munu.” Mu zabaka ve ti ya vwandaka vision. Mu bokilaka yawu vision ve. Mu tubaka, “Yawu monanaka mutindu kubwa-ngambu,” mu tubaka, “mu zaba ve yina yawu vwandaka. Mpe, cheri, mu—mu—mu—mu zola sakana na yawu ve, ba—ba ke tuba na munu ti ya ke diabulu. Mpe mu zola Mfumu Yesu.”

141 “Oh,” yandi tubaka, “Billy, nge lenda wa ve yina bantu ke tuba na nge.”

142 Mu tubaka, “Kasi, cherie, tala balongi yankaka.” Mu tubaka, “Mu—mu zola yawu ve.” Mu tubaka, “Mu ke kwenda na kisika ya munu na mfinda. Mu ke na ba dollars pene-pene ya kumi na tanu, nge keba Billy.” Billy vwandaka mwana-bakala ya leki, ya leki mingi. Mu tubaka, “Nge ke—nge ke keba . . . Yina ke mingi

samu na nge na Billy na kuzingila, na mwa ntangu fioti. Bokila bawu mpe tuba na bawu ti mbala yankaka mu ke—mu ke vutuka mbasi, mpe mbala yankaka mu ke vutuka diaka ve. Kana mu vutuka ve na manima bilumbu tanu, beno tula muntu mosi na kisika ya munu.” Mpe mu tubaka, “Meda, mu ke vutuka ata fioti ve na mfinda yina tii kuna Nzambi ke sila na munu ti Yandi ke katula kima yina na munu mpe ke bika yawu salama diaka ve.” Beno banza mutindu muntu lungaka zaba diaka kima ve!

¹⁴³ Mpe mu kwendaka kuna na mpimpa yina. Mu vutukaka na mwa yinzo ya munu ya nkulu ya bayinti, ya vwandaka kilumbu mosi na ntwala kilumbu yina landaka; ntangu vwandaka fioti na nsukinina. Kilumbu yina landaka mu lendaka kwenda kuna na tenta ya munu, kuna na . . . ntama kuna na zulu ya mongo, to mwa mongo mosi, mpamba ve, mpe kukuma kuna na mfinda. Mu ke ndima ve ti F.B.I. lendaka mona munu kuna. Na yawu mwa yinzo yayi ya bayinti. . . Mu sambilaka kuna na manima ya midi ya muvimba mpe na ntwala yawu kuma mpimpa mingi. Mu vwandaka sambila, mu vwandaka tanga na Biblia sika wapi Yawu me tuba, “Mpeve ya bapofete ke tumamaka na profete.” Mu lendaka bakula yawu ve. Mpamba ve yawu kumaka mpimpa mingi na mwa yinzo yina ya bayinti.

¹⁴⁴ Ya vwandaka kisika yina mu vwandaka tula mitambu ntangu mu vwandaka mwana ya fioti, mu tulaka mitambu mingi kuna, mpe mu kwendaka kuna mpe lobaka mpe vwandaka kuna mpimpa ya muvimba. Yawu vwandaka mwa yinzo mosi ya kubeba yina vwandaka kuna, yawu vwandaka kuna tuka bamvula mingi. Mbala yankaka muntu mosi vwandaka kuna na ntwala yawu kuma mutindu yina.

¹⁴⁵ Mpe na yawu mu—mu vwandaka vingila kaka kuna. Mpe mu banzaka, “Mbote.” Ya vwandaka pene-pene ya ngunga mosi, ngunga zole, ngunga tatu na suka, mu vwanda tambula-tambula, kukwenda simu na simu. Mu vwandaka na mwa ebonga mosi ya nkulu kuna, mwa . . . ebonga ve, mwa sanduku mosi ya mutindu yina. Mpe mu vwandaka kuna, mpe mu banzaka, “O Nzambi, samu na yinki Nge ke sala munu mutindu yayi?” Mu tubaka, “Tata, Nge zaba ti mu zola Nge. Nge zaba ti mu zola Nge! Mpe mu—mu—mu zola ve ti diabulu kuyala munu. Mu zola ve ti bima yina kusalama na munu. Ee Nzambi, kubika ve ti yawu salama diaka na munu.”

¹⁴⁶ Mu tubaka, “Mu—mu zola Nge. Mu zola kwenda ve na difelo. Wapi mfunu ya malongi mpe kumeka ya munu, mpe kubasisa bangolo ya munu nionso, kana mu ke na kifu? Mpe mu ke kukitwadisa munu mosi ve na difelo, mu ke twadisa bamafunda yankaka na nzila ya yimbi.” To, bankama yankaka, na bilumbu yina. Mpe mu tubaka. . . Mu vwandaka na ministere ya nene. Mpe mu tubaka, “Mbote, mu—mu zola ata fioti ve ti yawu salama diaka na munu.”

¹⁴⁷ Mpe mu vwandaka na mwa ebonga yayi. Mpe mu vwandaka, oh, mutindu yayi, kaka mutindu *yina*. Mpe, na mbala mosi, mu monaka Nsemo mosi na kati ya yinzo. Mpe mu banzaka ti muntu mosi vwandaka kwisa na torche. Mpe mu talaka ndambu na ndambu, mpe mu banzaka, “Mbote. . .” Mpe Yawu vwandaka awa, kuna na ntwala ya munu. Mabaya ya ntama vwandaka na nsi. Mpe Yawu vwandaka kuna, kaka na ntwala ya munu. Mwa dituka mosi ya nkulu vwandaka kuna na nsongi, kitini ya yawu ya zulu me katukaka. Mpe—mpe kaka *awa* Nsemo mosi vwandaka na nsi, mpe mu banzaka, “Mbote, wapi ya kele? Mbote, yina lunga kwisa ve. . .”

¹⁴⁸ Mu talaka ndambu na ndambu. Mpe Yawu vwandaka awa na zulu ya munu, Nsemo *yayi* mosi ya kulutila, kaka na zulu ya munu, ke ningana mutindu *yina*. Ya vwandaka zunga mutindu tiya, ntinta ya yawu vwandaka ya emeraude, ya vwandaka sala, “Wuushh, wuushh, wuushh!” mutindu yina, kaka na zulu ya Yawu, mutindu yina. Mpe mu talaka Yawu. Mu banzaka, “Yinki Yina?” Mpamba ve, Yawu bangisaka munu.

¹⁴⁹ Mu waka muntu mosi ke kwisa, [Mpangi Branham ke mekula kutambula ya muntu mosi—Mu.] ke tambula, kaka, kasi, makulu-mwasi. Mpe mu monaka dikulu ya Muntu kukota. Ya vwandaka mpimpa na kitini ya yinzo, bisika nionso kasi katula kaka awa sika wapi Yawu vwandaka ngengisa. Mpe mu monaka dikulu ya Muntu mosi kukota. Mpe na ntangu Yandi kotaka na kitini ya yinzo yina, yandi vwandaka tambula, Yandi vwandaka Muntu mosi pene-pene. . . yandi vwandaka na bakilo pene-pene ya makumi yivwa. Yandi balulaka maboko ya yandi na manima mutindu *yayi*. Mpamba ve, mu monaka Yandi na kati ya Kitembo, mu waka Yandi kutuba na munu, mu monaka Yandi na mutindu ya Nsemo mosi, kasi ya vwandaka mbala ya ntete mu mona kizizi ya Yandi. Yandi tambulaka tii na kisika mu vwandaka, kaka pene-pene ya munu.

¹⁵⁰ Mbote, ya kieleka bankundi ya munu, mu—mu banzaka ti mu zolaka kubwa ngambu. Munu. . .Beno banza kaka! Beno vwanda na kisika ya munu, Ya lendaka sala ti beno wa mutindu mosi na munu. Mbala yankaka beno me kuma ntama mingi na nzila kulutila munu, mbala yankaka beno ke Muklisto kubanda ntama, kasi Ya ke sala ti beno kuwa mutindu mosi na munu. Samu na manima bamvula nkama na nkama ya kukutana na munu, ya ke bukaka nzutu ya munu na ntangu Yandi ke kwisaka pene-pene ya munu. Na bantangu yankaka ya ke salaka munu. . . Mu ke kukizabaka diaka ve, mu ke lembaka mingi na ntangu nionso mu ke katuka na kisika ya malongi. Kana mu telama ntangu ya yinda, mu ke kukizabaka diaka ve. Ba ke twadisa munu na tomabilu na bangunga mingi, mu zabaka ve kisika mu vwandaka. Mpe mu lunga tendula yawu ve. Beno tanga awa na Biblia, Ya ke tendula Yawu, yina ya zola tuba. Masonuku ke tuba mutindu yina!

¹⁵¹ Na yawu mu vwandaka kuna mpe ke tala Yandi. Mu—mu tulaka diboko ya munu mutindu *yayi* na zulu. Yandi vwandaka tala munu na meso, na mutindu ya mbote. Kasi Yandi vwandaka na Ndinga ya nene, mpe Yandi tubaka, “Kubanga ve, Mu me tindama na Ntwala ya Nzambi ya Ngolo nionso.” Mpe na ntangu Yandi tubaka, Ndinga yina, Ndinga mosi yina tubaka na munu na ntangu mu vwandaka na bamvula zole, konso ntangu. Mu zabaka ti ya vwandaka Yandi. Mpe mu banzaka, “Ntangu yayi. . .”

¹⁵² Mpe beno wa yawu. Ntangu yayi beno wa disolo. Mu ke vutukila yawu na mutindu ya kulutila mbote, na yina mu zaba, mpova na mpova, samu ya ke mpasi samu mu bambuka moyo.

¹⁵³ Yandi. . . Mu tubaka. . . Mu vwandaka tala Yandi mutindu yayi. Yandi tubaka, “Kubanga ve,” na pima nionso, me tuba, “Mu me tindama na Ntwala ya Nzambi ya Ngolo nionso, samu na kutuba na nge ti lubutuku ya nge ya luswaswanu. . .” Mutindu beno zaba lubutuku ya munu salamaka kuna. Nsemo mosi yina vwandaka ningana na zulu ya munu na ntangu mu butukaka. Mpe Yandi tubaka mutindu yina, “Lubutuku ya nge ya luswaswanu mpe luzingu yina ba ke bakula na mutindu ya yimbi vwandaka samu kutalisa ti nge ke kwenda na yinza ya muvimba na kusambila samu na bambevo.” Mpe tubaka, “Mpe kukondwa kutala konso kimbevo yina bawu kele na yawu. . .” Mpe Yandi zonzaka nkumbu ya yawu. Nzambi, Yina ke Zuzi, zaba. Ti, Yandi tubaka nkumbu ya “cancer.” Ya tubaka, “Kima mosi ve. . . Kana nge nata bantu na kukwikila na nge, mpe nge vwanda ya kuvedila na ntangu nge ke sambila, kima mosi ve ke telemina bisambu ya nge, ata cancer ve.” Beno tala, “Kana nge nata bantu na kukwikila na nge.”

¹⁵⁴ Mpe mu monaka ti Ya vwandaka mbeni ya munu ve, Yandi vwandaka Nkundi ya munu. Mpe mu zabaka ve kana—kana mu ke fwa to yinki ke salama na ntangu Yandi vwandaka kwisa na munu mutindu yina. Mpe mu tubaka, “Mbote, Tata,” mu tubaka, “Mu ke. . .” Yinki mu zaba na yina me tadila bakubeluka ya nzutu mpe bima ya mutindu yina, makabu yina? Mu tubaka, “Mbote, Tata, mu ke. . . Mu—mu ke mputu ya bakala.” Mpe mu tubaka, “Mu ke na kati ya bantu ya munu. Mu—mu ke vwandaka na bantu ya munu yina kele bamputu. Mu me longukaka ve.” Mpe mu tubaka, “Mpe mu—mu—mu lenda ve, bawu lenda ve—bawu lenda ve kubakula munu.” Mu tubaka, “Bawu—bawu lenda ve—bawu lenda ve kuwa munu.”

¹⁵⁵ Mpe Yandi tubaka, “Mutindu profete Moise kuzwaka makabu zole, bidimbu,” mpamba ve, “samu na kusiamisa ministere ya yandi, nge mpe ba ke pesa nge zole—nge mpe ba ke pesa nge makabu zole samu na kusiamisa ministere ya nge.” Yandi tubaka, “Mosi ya yawu ke vwanda ti nge ke simba na diboko muntu yina nge ke sambidila, na diboko ya nge ya kikento nge ke simba diboko ya yandi ya kibakala,” mpe tubaka, “na

yawu vwanda kaka swi, mpe ya ke vwanda na . . .mvutu mosi ke monana pwelele na zulu ya nzutu ya nge.” Mpe tubaka, “Sambila na ntangu yina. Mpe kana yawu katuka, kimbevo me bika muntu yango. Kana yawu katuka ve, lomba kaka lusakumunu mpe kwenda na ntwala.”

“Mbote,” mu tubaka, “Tata, mu ke banga ti ba ke yamba munu ve.”

¹⁵⁶ Yandi tubaka, “Mpe kima yina me landa ke vwanda, kana bawu kuwa yina ve, na yawu bawu ke wa yayi.” Yandi tubaka, “Na yawu ya ke salama ti nge ke zaba kinsweki ya kati ya bantima ya bawu.” Yandi tubaka, “Bawu ke wa yayi.”

¹⁵⁷ “Mbote,” mu tubaka, “Tata, kikuma yawu yina mu kele awa na nkokila yayi. Bampangi ya munu banganga-Nzambi tubaka na munu ti mambu yina ke kumina munu vwandaka ya yimbi.”

¹⁵⁸ Yandi tubaka, “Nge butukaka na yinza yayi samu na kisalu yina.” (Beno tala, “makabu mpe lubokilu ba ke sobaka yawu ve.”) Yandi tubaka, “Nge butukaka na yinza yayi samu na kisalu yina.”

¹⁵⁹ Mpe mu tubaka, “Mbote, Tata,” mu tubaka, “ti, bampangi ya munu banganga-Nzambi tubaka na munu mutindu yina, ti ya vwandaka mpeve ya yimbi.” Mpe mu tubaka, “Bawu . . . Kikuma yawu yina mu me kwisa sambila awa.”

¹⁶⁰ Mpe tala yina Yandi tubaka na munu. Yandi tubaka na munu yina me tadila kwizulu ya Mfumu Yesu, na ntangu ya Yandi ya ntete. Mpe mu tubaka . . .

¹⁶¹ Kima ya ngitukulu vwandaka, bankundi ya munu . . . Mbote, mu ke telema fioti awa na muniti mosi, samu na kuvutukisa na manima. Yina vwanda bangisa munu, na ntangu nionso mu vwanda kutana na nganga-ngombo mosi, bawu zabaka ti kima mosi me salama. Mpe yina lendaka kaka . . . ya zolaka kufwa munu.

¹⁶² Mumbandu, kilumbu mosi munu na bampangi ya munu vwandaka luta na foire mosi, mpe beto vwandaka kaka bana ya fioti, beto vwandaka tambula. Na yawu kuvwandaka na mwa nganga-ngombo mosi ya nkulu yina vwandaka kuna na mosi ya batenta yina, mama mosi ya ntwenia, mama ya ntwenia ya kitoko, yandi vwandaka kuna. Mpe beto nionso vwandaka tambula, beto lutaka kuna. Yandi tubaka, “Tala, nge, kwisa fioti awa!” Mpe beto nionso tatu balukaka. Mpe yandi tubaka, “Nge yina me lwata kinkuti ya nzela-nzela.” Yina vwandaka munu.

¹⁶³ Mpe mu tubaka, “Yinga, mama?” Mu banzaka ti mbala yankaka yandi zolaka tinda munu samu na kusumbila yandi Coca, to kima yankaka ya mutindu yina. Mpe yandi vwandaka kento mosi ya ntwenia, mbala yankaka ya bamvula makumi zole, to kima mosi, yandi vwandaka kuna. Mpe mu kwendaka kuna, mu tubaka, “Yinga, mama, yinki mu lenda sala samu na nge?”

164 Mpe yandi tubaka, “Tala, nge ke zabaka ti Nsemo mosi ke landaka nge? Nge me butukaka na nsi ya kidimbu mosi.”

Mu tubaka, “Yinki nge zola tuba?”

165 Yandi tubaka, “Mbote, nge me butukaka na nsi ya kidimbu mosi. Ya ke na Nsemo mosi ke landaka nge. Nge me butukaka samu na lubokilu ya Nzambi.”

Mu tubaka, “Katuka awa, nge kento yayi!”

166 Mu bandaka na kukwenda, samu mama ya munu tubaka na munu ti bima yina vwandaka kaka ya diabulu. Yandi vwandaka ya kusungama. Na yawu munu . . . Yawu bangisaka munu.

167 Mpe kilumbu mosi na ntangu mu vwandaka mukengi ya baniama ya mfinda, mu zolaka sala nzietelo na bisi. Mpe mu mataka na bisi. Ya monanaka ti mu vwandaka ntangu nionso na kiyeka ya kuzaba mvwandulu ya bampeve. Mu telamaka kuna, mpe muntu yayi ke salaka na masuwa vwandaka ya kutelama na manima ya munu. Mu vwanda sala nzietelo yina samu na kusala lukengolo, mpe mu vwandaka kwenda kuna na Mfinda ya baniama ya Henryville, mu vwanda na bisi. Mu vwanda wa kima mosi ya ngitukulu. Mu talaka ndambu na ndambu kuna, mpe kuvwandaka na kento mosi ya nene kuna, ya kulwata mbote-mbote. Yandi tubaka, “Mbote na nge?”

Mu tubaka, “Mbote na nge!”

168 Mu banzaka ti ya vwandaka kaka kento mosi, beno zaba, yina vwandaka tuba, na yawu mu vwandaka kaka . . . Yandi tubaka, “Mu zola tuba na nge na mwa ntangu fioti.”

Mu tubaka, “Yinga, mama?” Mu balukaka.

Yandi tubaka, “Nge zaba ti nge me butukaka na nsi ya kidimbu mosi?”

169 Mu banzaka, “Tala diaka kento ya mutindu yankaka.” Na yawu mu fulaka kaka na kutala na nganda. Mpe na yawu mu tubaka ata ndinga diaka ve, mu vwanda kaka . . .

170 Yandi tubaka, “Mu lunga tuba na nge na mwa ntangu fioti?” Mu vwanda kaka . . . Yandi tubaka, “Kusala mutindu yina ve.”

171 Mu vwanda tala kaka na ntwala. Mu banzaka, “Yayi ke mbote ve.”

Yandi tubaka, “Mu zola tuba na nge na mwa ntangu fioti.”

172 Mu vwanda tala kaka na ntwala, mpe mu zolaka diaka ve kuwa yandi. Na mbala mosi mu banzaka, “Mu ke tala kana yandi ke tuba mutindu mosi na bayankaka.” Mu balukaka, mu banzaka, “Oh, la la! Ya ke bangisa munu, mu zaba.” Samu, mu vwanda zola ve kubanza mutindu yina. Mu balukaka.

173 Yandi tubaka, “Mbala yankaka kulutila mbote mu kukitendula munu mosi.” Yandi tubaka, “Mu ke nganga ya bambwetete.”

Mu tubaka, “Mu banzaka ti nge vwandaka muntu ya mutindu yina.”

174 Yandi tubaka, “Mu ke kwenda na Chicago samu na kutala mwana ya munu ya bakala yina ke longi ya Baptiste.”

Mu tubaka, “Yinga, mama.”

175 Yandi tubaka, “Muntu mosi ve me tubaka na nge ntete ti nge me butukaka na nsi ya kidimbu mosi?”

176 Mu tubaka, “Ve, mama.” Mu vunaka yandi kisika yina, beno me mona, mpe mu tubaka. . . mu zolaka tala kaka yina yandi zolaka tuba. Mpe yandi tubaka. . . Mu tubaka, “Ve, mama.”

Mpe yandi tubaka, “Ve. . . Balongi me tubaka na nge ntete mutindu yina ve?”

Mu tubaka, “Mu ke na diambu ya kusala na balongi ve.”

Mpe yandi tubaka, “Uh-huh.”

Mpe mu tubaka. . . yandi—yandi tubaka na munu. . . mu tubaka, “Mbote. . .”

177 Yandi tubaka, “Kana ya kieleka mu tuba na nge ntangu nge butukaka, nge ke kwikila na munu?”

Mu tubaka, “Ve, mama.”

Mpe yandi tubaka, “Mbote, mu lunga tuba na nge ntangu nge me butukaka.”

Mu tubaka, “Mu ke kwikila yawu ve.”

178 Mpe yandi tubaka, “Nge me butukaka na ngonda ya Yiya na kilumbu ya 6, 1909, na ngunga ya tanu na suka.”

179 Mu tubaka, “Ya kieleka.” Mu tubaka, “Yinki mutindu nge me zaba yawu?” Mu tubaka, “Tuba na munu yinki ntangu muntu ya masuwa yayi awa me butukaka.”

Yandi tubaka, “Mu lenda ve.”

Mpe mu tubaka, “Samu na yinki? Yinki mutindu nge zaba yawu?”

180 Yandi tubaka, “Tala, tata.” Yandi tubaka, na ntangu yandi bandaka kuzonzila malongi ya bambwetete ntangu yayi, mpe yandi tubaka, “Na manima bambvula yayi. . .” Yandi tubaka, “Nge ke bambuka moyo na ntangu mbwetete ya suka basikaka, yina twadisaka bantu ya ndwenga na Yesu Klisto?”

181 Mpe mu tinaka fioti kiuvu yina, beno zaba, mu tubaka, “Mbote, mu zaba kima mosi ve na yina me tadila nsambulu.”

182 Mpe yandi tubaka, “Mbote, nge me waka yina me tadila bantu ya ndwenga yina kwisaka tala Yesu.”

Mu tubaka, “Yinga.”

Mpe yandi tubaka, “Mbote, nani kele muntu ya ndwenga?”

“Oh,” mu tubaka, “bawu vwandaka kaka bantu ya ndwenga, na nionso yina mu zaba.”

183 Yandi tubaka, “Mbote, nani kele muntu ya ndwenga?” Yandi tubaka, “Mutindu mosi na yina mu kele, nganga ya bambwetete, ‘muntu ke talaka bambwetete’ mutindu ba ke bokilaka bawu.” Mpe yandi tubaka, “Nge zaba, na ntwala Nzambi kusala konso kima yina na zulu—na zulu ya ntoto, Yandi ke talisaka yawu na zulu, mpe na manima na zulu ya ntoto.”

Mpe mu tubaka, “Mu zaba ve.”

184 Mpe yandi tubaka, “Mbote . . .” Yandi bokilaka zole to tatu, zole . . . bambwetete tatu, mumbandu Mars, Jupiter, na Venus. Ya vwandaka yawu ve, kasi yandi tubaka, “Yawu kutanaka mpe kwisaka kintwadi mpe salaka . . .” Yandi tubaka, “Kuvwandaka na bantu ya ndwenga tatu yina kwisaka kutana na Mfumu Yesu, mpe mosi vwandaka ya dikanda ya Cham, mpe mosi ya Sem, mpe yina yankaka ya Japhet.” Mpe yandi tubaka, “Na ntangu bawu kutanaka kintwadi na Bethlehem, bambwetete tatu yina bawu kwisaka na yawu . . . Konso muntu na zulu ya ntoto,” yandi tubaka, “bawu vwandaka na kima ya kusala ve na bambwetete.” Yandi tubaka, “Yufula muntu ya masuwa yina kuna na ntangu ngonda ke zindaka mpe mbwetete ya zulu ke zindaka, kana masa ke kitaka ve mpe ke mataka na yawu ve.”

Mu tubaka, “Mu ke yufula yandi ve, mu zaba yawu.”

185 Mpe yandi tubaka, “Mbote, lubutuku ya nge kele na kima mosi ya kusala na bambwetete yina kuna na zulu.”

Mpe mu tubaka, “Mbote, yina mu zaba ve.”

186 Mpe yandi tubaka, “Ntangu yayi, bantu ya ndwenga yayi tatu kwisaka.” Mpe yandi tubaka, “Na ntangu bambwetete yayi tatu, na ntangu yawu . . . Yawu kwisaka mosi na mosi na nzila ya yawu mpe yawu kutanaka na Bethlehem. Mpe ba tubaka ti bawu zabaka na kukutana ya bawu ti, mosi vwandaka ya dikanda ya Cham, Sem, na Japhet, bana-babakala tatu ya Noé.” Mpe yandi tubaka, “Na yawu bawu kwisaka samu na kukembila Mfumu Yesu Klisto.” Mpe yandi tubaka, “Na ntangu ya kukwenda,” yandi tubaka, “bawu nataka makabu tatu samu na kupesa Yandi.”

187 Mpe yandi tubaka, “Yesu Klisto tubaka na ministere ya Yandi ti na ntangu ba ke longa Nsangu yayi ya mbote na yinza ya muvimba (Na bantu ya Cham, Sem, na Japhet), na manima Yandi ke kwisa diaka.” Mpe yandi tubaka, “Ntangu yayi, bambwetete yina, bambwetete ya mazulu, mutindu ya ke tambulaka kintwadi . . .” Yandi tubaka, “Bawu kabwanaka. Bawu me vwandaka ata fioti ve mutindu yina na zulu ya ntoto, na yina beto zaba. Kasi” tubaka “na bantangu nionso ya bankama ya bamvula, banzila ya yawu kukutanaka mutindu *yayi*.” Kana awa kele na muntu yina ke longukaka bambwetete, beno lendaka zaba yina yandi vwandaka tubila. Mu zaba ve. Na yawu na ntangu yandi vwandaka tu-. . . Yandi tubaka, “Yawu kutanaka mutindu yina.” Mpe yandi tubaka, “Samu

na kubambuka Dikabu ya kulutila nene yina pesamaka na bantu, na ntangu Nzambi pesaka Mwana ya Yandi. Na ntangu bambwetete yayi tatu me kutana diaka, samu na yinki,” yandi tubaka, “Yandi me tinda diaka dikabu mosi na zulu ya ntoto.” Mpe yandi tubaka, “Nge butukaka na kukutana ya ntangu yina.” Mpe yandi tubaka, “Kikuma yawu yina mu me zaba yawu.”

¹⁸⁸ Mbote, na manima mu tubaka, “Mama, kima ya ntete, mu me ndima kima mosi ve na kati ya yawu. Mu ke musambidi ve, mu zola wa yawu diaka ve!” Mu kwendaka. Mpe ya ke mutindu yina mu zengaka yandi ndinga na bunkufi. Na yawu mu basika mpe kwendaka.

¹⁸⁹ Mpe na konso ntangu yina . . . mu vwandaka na mosi ya bawu, ya vwandaka kaka mutindu yina. Mpe mu banzaka, “Samu na yinki bampeve yina ya yimbi ke salaka mutindu yina?”

¹⁹⁰ Na manima balongi, tubaka, “Yina ke diabulu! Yina ke diabulu!” Bawu nataka munu na kukwikila yawu.

¹⁹¹ Mpe na yawu na mpimpa yina kuna na ntangu mu . . . na ntangu Yandi vutukilaka na kutuba yawu, mu yufulaka Yandi, mu tubaka, “Mbote, samu na yinki banganga-ngombo mpe bima nionso yina, mpe bantu yina kele na bampeve ya yimbi, ke tubila munu Yawu konso ntangu; mpe banganga-Nzambi yina, bampangi ya munu, ke tuba na munu ti yina ke mpeve ya yimbi?”

¹⁹² Ntangu yayi beno wa yina Yandi tubaka, Yandi Yina kele na foto. Yandi tubaka, “Mutindu ya vwandaka na ntangu yina, mutindu mosi ya ke na ntangu yayi.” Mpe Yandi bandaka na kutubila munu, ti, “Na ntangu ministere ya Mfumu ya beto Yesu Klisto bandaka, balongi tubaka, ‘Yandi vwandaka Béelzébul, diabulu’; kasi bampeve ya yimbi tubaka, ‘Yandi vwandaka Mwana ya Nzambi, Santu Yina ya Israel.’ Bampeve ya yimbi . . . Mpe beno tala Paul na Barnabas na ntangu bawu vwandaka longa kuna. Balongi tubaka, ‘Bantu yayi ke tula mubulu na yinza. Bawu kele yimbi, bawu kele—bawu kele ya diabulu.’ Mpe nganga-ngombo mosi kuna na bala-bala, zabaka ti Paul na Barnabas vwandaka bantu ya Nzambi, yandi tubaka, ‘Bawu ke bantu ya Nzambi yina ke talisa na beto nzila ya Luzingu.’” Ya kieleka? “Banganga-ngombo mpe banganga-nkisi, bantu ya bampeve ya yimbi.”

¹⁹³ Kasi beto me beba mingi na théologie tii kuna beto zaba diaka kima ve na yina me tadila Mpeve. Mu ke na kivuvu ti beno ke zola munu kaka na manima ya yayi. Kasi yawu yina ya kele. Mu zola tuba ba Pentecotiste, diaka! Ya kieleka. Kuboka na kukina zola tuba ve ti beno zaba kima mosi na yina me tadila Mpeve.

¹⁹⁴ Yawu ke kukutana ya muntu yandi mosi, mbunzu na mbunzu, yawu yina beno ke na yawu nsatu. Yina ke mutindu

ya Dibuundu Nzambi ke telemisa, ya kieleka, ntangu bawu me vukana kintwadi na ngwisani mpe na ngolo, kati na Mpeve.

¹⁹⁵ Mpe Yandi tubilaka munu yawu. Mpe Yandi tubaka na munu ti balongi bakulaka Yawu na mutindu ya yimbi, mpe ndimisaka munu ti balongi bakulaka Yawu na mutindu ya yimbi. Mpe ntangu yandi tubaka na munu mambu yayi mpe wapi mutindu Yesu. . .

¹⁹⁶ Mu tubaka, “Mbote, yinki samu na yayi, bima yayi ke kumina munu?”

¹⁹⁷ Mpe, beno me mona, Yandi tubaka, “Ya ke fuluka mpe ke kuma nene mpe nene mingi diaka.” Mpe Yandi tubilaka munu yawu, ya tubaka na munu mutindu Yesu salaka yawu; wapi mutindu Yandi kwisaka mpe Yandi vwandaka na Ngolo ti ya lendaka zaba mambu na ntwala mpe kutuba na bakento yina na dibulu ya masa, ya tubaka ve ti yandi lendaka belusa bambevo, ya tubaka ti ya vwandaka sala bima yina na mutindu Tata talisaka Yandi.

Mu tubaka, “Mbote, ya lenda vwanda mpeve ya yinki mutindu?”

Yandi tubaka, “Yawu vwandaka Mpeve-Santu.”

¹⁹⁸ Na yawu kima mosi ke salama na kati ya munu, mu bakulaka ti kima ya mfunu mingi yina mu vwanda pesa mukongo kikuma yawu yina Nzambi nataka munu awa. Mpe mu bakulaka ti ya vwandaka mutindu mosi na ba Pharisien ya bilumbu yina me luta, bawu tendulaka Masonuku na mutindu ya yimbi samu na munu. Na yawu kubanda ntangu yina mu bakaka ntendulu ya munu mosi samu na Yawu, yina Mpeve-Santu tubaka.

Mu tubaka na Yandi, “Mu ke kwenda.”

Yandi tubaka, “Mu ke vwanda na nge.”

¹⁹⁹ Mpe Wanzio kotaka diaka na Nsemo yina mpe bandaka na kubaluka mpe kubaluka, mpe kubaluka mpe kubaluka, mpe kubaluka na makulu ya Yandi mutindu yina, ya mataka na kati ya Nsemo mpe basikaka na yinzo.

Mu vutukaka na yinzo muntu ya malu-malu.

²⁰⁰ Mu kwendaka kuna na yinzo-Nzambi mpe tubaka yawu na bantu na . . . ya vwandaka na lumingu na mpimpa.

²⁰¹ Mpe na Kilumbu ya tatu na mpimpa bawu nataka kento mosi kuna, mosi ya minganga ya lupitalu ya ba Mayo yina zolaka kufwa na cancer, kima mosi ve kasi mikuwa kaka. Na ntangu mu kitaka samu na kusimba yandi, vision mosi kwisaka na ntwala ya munu, ya talisaka ti yandi vutukilaka diaka kisalu ya yandi ya munganga. Mpe nkumbu ya yandi kele na mukanda ya Louisville, “yandi me fwaka kubanda bamvula mingi me luta.” Yandi kele kuna na Jeffersonville ntangu yayi, na kisalu ya munganga, yandi ke sala kisalu ya yandi ya munganga

bamvula mingi me luta. Mpamba ve, mu talaka kuna na zulu, mpe mu monaka vision yina. Mu balukaka, mu zabaka ve yina mu vwanda sala, ya kutelama kuna, mu bangaka ntete na ntangu bawu nataka mbevo yina mpe lalisaka yandi kuna. Mpe minganga mpe nionso yina vwandaka ya kutelema pene-pene ya yandi, mpe yandi vwandaka ya kulala kuna, mpe kizizi ya yandi nionso vwandaka ya kukota na meso ya yandi kuna na kati.

²⁰² Margie Morgan. Kana beno zola sonikila yandi mukanda, yandi kele na 411 Knobloch Avenue, Jeffersonville, Indiana. To beno sonika na Clark County Hospital, Jeffersonville, Indiana. Yandi ke pesa beno kimbangi.

²⁰³ Mu talaka kuna. Mpe samu na mbevo yina ya ntete, kutala awa ti, vision mosi kwisaka. Mu monaka diaka munganga yina ya kento, ke tambula, mbote mpe na ngolo mpe na mavimpi ya mbote. Mu tubaka, “MUTINDU ME TUBA MFUMU, ‘Nge ke zinga mpe nge ke fwa ve!’”

²⁰⁴ Bakala ya yandi, muntu mosi ya nene na mambu ya yinza yayi, yandi talaka munu mutindu yayi. Mu tubaka, “Tata, kubanga ve! Kento ya nge ke zinga.”

²⁰⁵ Yandi bokilaka munu na nganda, yandi tubaka...yandi bokilaka badokotolo zole to tatu, yandi tubaka, “Nge zaba bawu?”

Mu tubaka, “Yinga.”

²⁰⁶ “Ee,” yandi tubaka, “Mu bulaka nsaka ya golf na yandi. Yandi tubaka, ‘Cancer ziungaka misopo ya yandi, ti ba lendaka ata kutungula yandi ve.’”

²⁰⁷ Mu tubaka, “Mu ke tala ve yina yandi kele na yawu! Kima mosi kele na kati ya munu, mu monaka vision mosi! Mpe na yawu Bakala yina tubaka na munu, ya tubaka, nionso yina mu ke mona, mu tuba yawu mpe ya ke vwanda mutindu yina. Mpe Yandi tubaka na munu mpe mu ke kwikila yawu.”

²⁰⁸ Nzambi kubaka lukumu! Na manima ya mwa bilumbu fioti yandi vwanda sukula bilele ya yandi, ke tambula. Ntangu yayi yandi ke na bakilo makumi sambwadi na tanu, na mavimpi ya mbote.

²⁰⁹ Na yawu na ntangu mu ndimaka yawu, na mbala mosi nsangu panzanaka. Na yawu Robert Daugherty bokilaka munu. Mpe awa nsangu panzanaka, na Texas ya muvimba, mpe na yinza ya muvimba.

²¹⁰ Mpe kilumbu mosi na nkokila, pene ya mbala zole to tatu kuna...Mu lendaka bakula ve kutuba na bandinga ya malu-malu mpe nionso yina. Mu vwanda kwikila na mbotika ya Mpeve-Santu, mu vwanda kwikila ti bantu lenda tuba na bandinga ya malu-malu. Mpe kilumbu mosi na nkokila na ntangu mu vwanda tambula kuna...na kati ya katedrale mosi, na San Antonio, na Texas, mu vwanda tambula kuna, muntu

mosi bandaka na kutuba na bandinga ya malu-malu mutindu munduki yina kele na kubula, to mitrayeze mosi, nswalu-nswalu. Na nsuka, kuna na manima, muntu mosi telemaka mpe tubaka, “MUTINDU ME TUBA MFUMU! Bakala yina kele na kukwenda na kisika ya malongi yandi ke kwenda na ntwala na ministere yina me siamisama na Nzambi ya Ngolo nionso. Mpe mutindu ba tindaka Jean-Baptiste mutindu munati-nsangu ya ntete na ntwala ya kwizulu ya Yesu Klisto, yandi mpe kele na Nsangu mosi yina ke kotisa Kwizulu ya Zole ya Mfumu Yesu Klisto.”

211 Mu zolaka zinda na kati ya basapatu ya munu. Mu talaka na zulu, mu tubaka, “Nge zaba bakala yina?”

Yandi tubaka, “Ve, tata.”

Mu tubaka, “Nge zaba yandi?”

Yandi tubaka, “Ve, tata.”

Mu tubaka, “Nge zaba munu?”

Yandi tubaka, “Ve, tata.”

Mu tubaka, “Yinki nge ke na kusala awa?”

212 Yandi tubaka, “Mu tangaka yawu na zulunale.” Mpe ntangu nionso . . . Yina vwandaka nkokila ya ntete ya lukutakanu.

Mu talaka kuna mpe mu tubaka, “Yinki mutindu nge me kwisa awa?”

213 Yandi tubaka, “Bantu ya dibuta ya munu tubaka na munu ti nge ke vwanda awa, ‘munganga ya Nzambi,’ mpe mu kwisaka.”

Mu tubaka, “Beno me zabana ve beno nionso?”

Yandi tubaka, “Ve.”

214 Oh, la la! Kuna mu monaka ngolo ya nene ya Mpeve-Santu . . . Nzoka nde na ntangu mosi kuna mu banzaka ti ya vwandaka kima ya yimbi, mpe mu zabaka ti mu . . . Wanzio ya Nzambi mosi yayi vwandaka na ngwisani na bantu yina vwandaka na bima yina. Ata ti bawu vwandaka na yina ya kieleka ve mpe mubulu mingi mpe bituba-tuba na kati ya yawu, kasi kuna na kati vwandaka na kima ya kisina. [Kisika ya mpamba na bande—Mu.] . . . Klisto. Mpe mu monaka ti yawu—yawu vwandaka ya kieleka.

215 Oh, bamvula mingi me luta, mpe na balukutakanu bantu lendaka mona, ba vision mpe nionso yina.

216 Kilumbu mosi fotografe mosi kangaka Yawu na foto na ntangu mu vwandaka ya kutelema kuna na Arkansas, mu banza ya vwandaka, na lukutakanu ya mutindu mosi na yayi, na lukutakanu ya mutindu mosi na yayi. Mpe mu vwandaka ya kutelema, mu vwanda meka kutendula Yawu. Bantu me zaba yawu, bawu lenda vwanda mpe kuwa, ba Methodiste, ba Baptiste, ba Presbyterien, mpe nionso yina. Mpe na ntangu mu

talaka, ya kotaka kuna na kielo, Yawu kotaka awa, ke sala, “Wuushh, wuushh!”

217 Mu tubaka, “Mu ke tuba diaka ve, samu Yawu yayi ke kwisa ntangu yayi.” Mpe Yawu mataka, mpe bantu bandaka na kuboka. Ya kwisaka tii na kisika yina mu vwandaka mpe telemaka kuna.

218 Kaka na ntangu Yawu vwandaka sikama, longi mosi bakaka mbangu mpe tubaka, “Tala, mu me mona Yawu!” Mpe Yawu fwaka yandi meso kasi—kasi yandi ya muvimba, yandi vutukaka ke tenguna. Beno lunga tala foto ya yandi kuna na kati ya buku mpe beno mona yandi mutindu ya vwanda vutuka ke tenguna na yintu ya yandi ya kutekama na lweka. Beno lunga mona foto ya yandi.

219 Mpe Yawu sikamaka kuna. Ya ke kaka fotografe ya zulunale yina kangaka Yawu na foto na mbala yina. Kasi Mfumu vwandaka ya kukubama ve.

220 Mpe na nkokila mosi kuna na Houston, na Texas, na ntangu, oh, mafunda na mafunda ya bantu. . . Beto vwandaka bantu nkama nana. . . bantu mafunda nana vwandaka kuna na yinki-yayi, kuna na yinzo ya musiki, beto kwendaka kuna na Stade ya nene ya Sam Houston.

221 Mpe kuna na kati ya masolo na nkokila yina, na ntangu longi mosi ya Baptiste tubaka ti mu “vwandaka kima mosi ve kasi kaka muntu ya luvunu mingi mpe mumekudi mosi, mumekudi mosi ya nsambulu, ya lombaka ti bawu basisa munu na mbanza” mpe yandi lendaka vwanda mosi yina lenda sala yawu.

222 Mpangi Bosworth tubaka, “Mpangi Branham, nge lenda pesa muswa ti kima ya mutindu yina kusalama? Manisa ntembe!”

223 Mu tubaka, “Ve, tata, mu ke kwikilaka ve na kuswana. Nsangu ya mbote kwisaka ve samu bantu kuswana, kasi samu bantu kuzingila Yawu.” Mpe mu tubaka, “Yandi ke fula kaka mutindu yina, ata yinki mutindu nge me ndimisa yandi.” Mu tubaka, “Yandi. . . yawu ke sala yandi kima mosi ve. Kana Nzambi lenda tuba na ntima ya yandi ve, wapi mutindu mu lunga sala yawu?”

224 Kilumbu yina landaka yawu kumaka na zulunale, bawu tubaka, “Ya ke talisa yina ke na kati ya bawu,” Houston Chronicle. Ya tubaka, “Ya ke talisa yina ke na kati ya bawu, bawu ke banga na kunwanina yina bawu ke longaka.”

225 Kiboba ya Mpangi Bosworth kwisaka na munu, yandi vwandaka na bamvula makumi sambwadi na ntangu yina, kiboba ya mpangi-bakala ya lutondo, yandi tulaka maboko ya yandi na zulu ya mapeka ya munu, yandi tubaka, “Mpangi Branham,” yandi tubaka, “nge zola tuba ti nge ke manisa ntembe yina ve?”

226 Mu tubaka, “Ve, Mpangi Bosworth. Ve, tata. Mu ke manisa ntembe yina ve.” Mu tubaka, “Yina ke na mfunu ve.” Mu tubaka, “Ya ke nata kaka kuswana na ntangu beto ke katuka na kisika ya malongi.” Mu tubaka, “Mu ke simbisa bandandani ya balukutakanu na ntangu yayi, mpe mu zola bebisa ve mambu mutindu yina.” Mu tubaka, “Bika yandi sala yina yandi lenda sala.” Mu tubaka, “Yawu yina, yandi ke tula kaka makelele.” Mu tubaka, “Beto me kutanaka ntete na bantu ya mutindu yina, mpe ya ke na mfunu ve na kutuba na bawu.” Mu tubaka, “Ba ke kwenda kaka, ba ke bikala kaka mutindu yina.” Mu tubaka, “Kaka na ntangu bawu me kuzwa luzabu ya Kieleka mpe bawu me yamba Yawu ve, Biblia me tuba ti bawu me luta ndilu mpe bawu lenda kuzwa lemvo ve na yinza yayi to na yinza yina ke kwisa. Bawu ke bokila Yawu ‘ya diabulu’ mpe nzila yankaka kele ve samu na bawu. Bawu ke na mpeve ya kusambila yina kele ya diabulu.”

227 Yikwa zaba ti yina ke kieleka, ti mpeve ya yimbi kele yina ke sambilaka? Yinga, tata, bawu zola mingi misiku. Mpe na yawu, mpamba ve, yina me sepelisa bantu ve na ntangu mu me tuba ti “bawu zola mingi misiku,” kasi yina ke kieleka. “Bawu ke na luzingu ya bunzambi na nganda kasi ke manga Ngolo ya yawu.” Ya kieleka. Bidimbu mpe bimangu kele yina ke siamisa Nzambi, ntangu nionso. Mpe Yandi tubaka ti ya ke vwanda mutindu mosi na bilumbu ya nsuka. Beno banza yawu!

228 Kiboba ya Mpangi Bosworth, munu . . . yandi zolaka kwisa na munu, mpe yandi vwandaka fioti ya kulemba. Yandi me katuka na Japon. Yandi zolaka vwanda awa. Yandi ke kwenda na Lubbock na munu. Mpe yawu yina yandi vwandaka . . . yandi vwandaka na mwa, miyoyo ya ngolo, yawu yina yandi lendaka kwisa ve na mbala yayi, yandi mpe kento ya yandi. Mpe yawu yina yandi . . .

229 Muntu nionso monaka ti yandi vwandaka mutindu mosi na Caleb. Yandi telemaka kuna, yandi tubaka, “Mbote, Mpangi Branham,” na kutala yina ya mbote, beno zaba, yandi tubaka, “bika mu sala yawu,” mpe yandi tubaka, “kana nge zola sala yawu ve.”

230 Mu tubaka, “O Mpangi Bosworth, mu—mu zola ve ti nge sala mutindu yina. Beno lunga swana.”

Yandi tubaka, “Ata mpova mosi ya kuswana ke vwanda ve.”

231 Ntangu yayi, kaka na ntwala mu sukisa, beno wa yayi. Yandi kwendaka kuna. Mu tubaka, “Kana beno ke swana ve, mbote mingi.”

Yandi tubaka, “Mu me sila ti mu ke swana ve.”

232 Kuvwandaka na bantu pene-pene ya mafunda makumi tatu yina vukanaka kisika yina na nkokila yina. Mpangi Wood, yina vwandaka kuna, ya vwanda kuna na ntangu yina, ya vwandaka na lukutakanu yango. Mpe munu . . .

233 Mwana ya munu ya bakala tubaka, to...Kento ya munu tubaka, “Nge ke kwenda ve na lukutakanu yina kuna?”

234 Mu tubaka, “Ve. Mu lenda kwenda kuna ve mpe kuwa kuswana ya bawu. Ve, tata. Mu lenda kwenda kuna ve mpe kuwa yawu.”

Ntangu mpimpa kubwaka, Kima mosi tubaka, “Kwenda kuna.”

235 Mu bakaka taxi, mpangi ya munu ya bakala, mpe kento ya munu na bana ya munu, beto kwendaka kuna. Mu mataka kuna na zulu na balcon makumi tatu, na zulu mingi mutindu yayi, mpe mu vwandaka.

236 Kiboba ya Mpangi Bosworth mataka kuna mutindu kiboba ya ntumwa, beno zaba. Yandi vutukilaka kusonika mwa... Yandi vwandaka na bansilulu ya Biblia nkama sambanu ya luswaswanu yina yandi vutukilaka kusonika. Yandi tubaka, “Ntangu yayi, Docteur Best, kana nge lenda mata awa mpe kubaka mosi ya bansilulu yayi mpe kutelemina yawu na nzila ya Biblia. Bansilulu yayi nionso kele na kati ya Biblia, ke tuba ti Yesu Klisto ke belusa bambevo bubu yayi. Kana nge lunga baka mosi ya bansilulu yayi mpe, na nzila ya Biblia, kutelemina yawu na Biblia, mu ke vwanda, mu ke pesa nge mbote, mu ke tuba ti, ‘Nge me nunga.’”

237 Yandi tubaka, “Mu ke tala diambu yango na ntangu mu ke mata kuna!” Yandi zolaka vwanda muntu ya nsuka samu na kusawula Mpangi Bosworth, beno me mona.

238 Na yawu Mpangi Bosworth tubaka, “Mbote, Mpangi Best, mu ke yufula nge kiuvu mosi, mpe kana nge lenda pesa munu mvutu na ‘yinga’ to ‘ve,’” mu tubaka, “beto ke manisana ntembe ntangu yayi.”

Mpe yandi tubaka—yandi tubaka, “Mu ke tala diambu yango!”

Yandi lombaka muswa na ntwadisi ya lukutakanu kana yandi lendaka yufula yandi. Yandi tubaka, “Yinga.”

239 Yandi tubaka, “Mpangi Best, bankumbu ya Yehowa samu na mpulusu me tadila mpe Yesu? ‘Yinga’ to ‘ve?’”

240 Yina sukisaka yawu. Yina vwandaka nionso. Mu ke tuba na beno, mbala mosi mu waka kima mosi na nzutu ya muvimba. Mu banzaka mutindu yina ata fioti ve, munu mosi, beno me mona. Mpe mu banzaka, “Oh, la la, yandi lunga pesa mvutu ve! Ya kangamaka.”

Yandi tubaka, “Mbote, Docteur Best, mu me—mu me yituka.”

Yandi tubaka, “Mu ke tala diambu yango!”

241 Ya tubaka, “Mu me yituka ti nge lunga pesa mvutu ve na kiuvu ya munu ya pete-pete.” Yandi vwandaka kaka swi,

mpe yandi zabaka sika wapi yandi vwandaka. Na yawu yandi vwandaka kuna na Disonuku yina.

Yandi tubaka, “Baka bamuniti ya nge makumi tatu, na maninma mu ke pesa mvutu na yawu!”

²⁴² Mpe kiboba ya Mpangi Bosworth vwandaka kuna mpe bakaka Disonuku yina mpe kangaka na yawu bakala yina tii kuna kizizi ya yandi kumaka mbwaki na mutindu ti ya lendaka pelisa na yawu zalumeti, na zulu ya yawu.

²⁴³ Yandi telemaka kuna, na makasi, mpe yandi losaka bapapié na ntoto, yandi mataka kuna mpe longaka dilongi mosi ya mbote ya ba Campbellite. Mu vwandaka Baptiste, mu zaba yina ba ke kwikilaka. Ata fioti ve yandi . . . Yandi vwandaka longa samu na yina me tadila mvumbukulu, “‘na ntangu nzutu yayi ya lufwa ke lwata yina ke fwaka ve,’ na yawu beto ke kuzwa kubeluka ya nzutu yina me katuka na Nzambi.” Oh, la la! Yinki ke vwanda mfunu ya kubeluka ya nzutu yina me katuka na Nzambi na ntangu beto ke lwata yina ke fwaka ve (“na ntangu nzutu yayi ya lufwa ke lwata yina ke fwaka ve,” mvumbukulu ya bafwa)? Yandi ke tula mpe ntembe na kimangu yina Yesu salaka na Lazare, ya tubaka, “Yandi fwaka diaka, mpe yina vwandaka kaka kima ya ntangu fioti.” Beno me mona?

²⁴⁴ Mpe na ntangu ya manisaka mutindu yayi, yandi tubaka, “Benó nata awa munganga yina ya Nzambi mpe mu tala yandi kusala!”

²⁴⁵ Bawu bendanaka fioti na ntangu yina. Mpangi Bosworth tubaka, “Mu me yituka nge, Mpangi Best, nge me vutula mvutu ve na kiuvu yina mu me yufula nge.”

²⁴⁶ Mpe na ntangu yina yandi bulanganaka, yandi tubaka, “Benó nata awa munganga yina ya Nzambi mpe mu tala yandi kusala!”

Yandi tubaka, “Mpangi Best, nge ke kwikilaka ti bantu ke na kuvulukaka?”

Yandi tubaka, “Ya kieleka!”

Yandi tubaka, “Nge ke zola ti ba bokila nge mvulusi yina me katuka na Nzambi?”

Yandi tubaka, “Mbote, ata fioti ve!”

²⁴⁷ “Kuyika ve. . . Ata ti beno me longa mpulusu ya moyo yina ke sala beno ve mvulusi yina me katuka na Nzambi.”

Yandi tubaka, “Mbote, ya kieleka ya ke mutindu yina ve!”

²⁴⁸ Yandi tubaka, “Mutindu mosi mpe na Mpangi Branham yandi me kuma ve munganga yina me katuka na Nzambi samu yandi ke longa kubeluka ya nzutu yina me katuka na Nzambi. Yandi ke munganga yina me katuka na Nzambi ve, yandi ke twadisa bantu na Yesu Klisto.”

249 Mpe yandi tubaka, “Beno nata yandi awa, mu tala yandi kusala! Beno bika mu tala bantu, na mvula mosi, mpe mu ke tuba na beno kana mu ke kwikila Yawu to ve.”

250 Mpangi Bosworth tubaka, “Mpangi Best, ya me fwanana na diambu yina salamaka na Calvaire, ‘Kulumuka na Kulunsi mpe beto ke kwikila na Nge.’” Beno me mona?

251 Mpe na yawu, oh, yandi natamaka. Yandi tubaka, “Beno bika mu tala yandi kusala! Beno bika mu tala yandi kusala!” Bantwadisi ya lukutakanu vwandisaka yandi. Yandi kwendaka kuna, mpe kuvwandaka na longi mosi ya Pentecotiste ya kutelema kuna, yandi bulaka yandi bambata nsongi na nsongi ya kisika ya malongi. Mpe na yawu bawu kangaka yandi. (Na yawu Mpangi Bosworth tubaka, “He, he! Ve, ve.”) Na yawu bantwadisi ya lukutakanu vwandisaka yandi.

252 Raymond Richey telemaka, yandi tubaka, “Yayi ke nkadulu ya Lukutakanu ya ba Baptiste ya Sud?” Yandi tubaka, “Beno balongi ya ba Baptiste, Lukutakanu ya ba Baptiste ya Sud tindaka bakala yayi to yandi kwisaka na mutindu ya yandi mosi?” Bawu lendaka pesa mvutu ve. Yandi tubaka, “Mu ke yufula beno!” Yandi zabaka bawu, bawu nionso.

253 Bawu tubaka, “Yandi kwisaka na mutindu ya yandi mosi.” Samu mu zaka ti ba Baptiste ke kwikilaka na kubeluka ya nzutu yina me katuka na Nzambi, mpe. Na yawu yandi tubaka, “Yandi kwisaka na mutindu ya yandi mosi.”

254 Na yawu diambu salamaka yawu yayi. Na yawu Mpangi Bosworth tubaka, “Mu zaba ti Mpangi Branham kele na kati ya lukutakanu, kana yandi zola kwisa samu na kusukisa lukutakanu, yina ke vwanda mbote mingi.”

Na yawu Howard tubaka, “Vwanda kaka swi!”

Mu tubaka, “Mu kele swi.”

255 Mpe kaka na ntangu yina mu waka Kima mosi pene-pene kuna, yawu bandaka na kubaluka pene-pene, mpe mu zabaka ti Yina vwandaka Wanzio ya Mfumu, ya tubaka “Telema!”

256 Bantu pene-pene ya nkama tanu tulaka maboko ya bawu mutindu *yayi*, bawu salaka nzila mosi, mu kulumukaka na kisika ya malongi.

257 Mu tubaka, “Bankundi ya munu, mu ke munganga yina me katuka na Nzambi ve. Mu ke mpangi ya beno.” Mu tubaka, “Mpangi Best, kukondwa . . .” To, “Mpangi Best,” mu tubaka, “nkatu kukondwa nge luzitu, mpangi ya munu, na mutindu nionso. Nge ke na muswa na bakundima ya nge, mutindu mosi na munu.” Mu tubaka, “Ya kieleka, nge me mona ve mutindu ya kusiamisa yawu, dibanza ya nge, na nzila ya Mpangi Bosworth. Nge lenda sala yawu ve na muntu yankaka yina me tangaka Biblia mbote-mbote, yina zaba bima yina.” Mu tubaka, “Na yina me tadila kubelusa bantu, mu lunga belusa bawu ve, Mpangi

Best. Kasi mu kele awa na nkokila nionso, kana nge zola mona Mfumu ke sala bimangu, kwisa kaka awa. Yandi ke sala yawu konso nkokila.”

²⁵⁸ Mpe yandi tubaka, “Mu zola mona nge kubelusa muntu mosi mpe nge bika munu tala bawu! Nge lenda loka bawu mpongi na mutindu ya nge ya kuloka, kasi” yandi tubaka, “mu zola tala yawu na mvula mosi na manima!”

Mu tubaka, “Mbote, nge lenda vwanda na muswa ya kulandila bawu, Mpangi Best.”

²⁵⁹ Yandi tubaka, “Ya ke kaka beno nkonga ya ba-exalté yina ke na mayele ve ke kwikilaka na bima ya mutindu yina. Ba Baptiste ke kwikilaka ve na buzoba ya mutindu yina.”

²⁶⁰ Mpangi Bosworth tubaka, “Vingila fioti.” Yandi tubaka, “Bantu yikwa kele awa, na kati ya basabala yayi zole awa, bayina ke sambilaka na mabuundu ya kitoko yayi ya ba Baptiste awa na Houston, yina lunga siamisa ti beno belukaka na Nzambi ya Ngolo nionso na ntangu Mpangi Branham vwandaka awa?” Mpe bantu kulutila nkama tatu telemaka. Yandi tubaka, “Yinki nge me tuba samu na yawu?”

²⁶¹ Yandi tubaka, “Bawu ke ba Baptiste ve!” Yandi tubaka, “Muntu nionso lunga sala kimbangi ya konso diambu yina, yina zola tuba ve ti diambu yina kele ya kieleka!”

²⁶² Yandi tubaka, “Ndinga ya Nzambi ke tuba ti yina kele kieleka, mpe nge lunga telemina yawu ve. Mpe bantu ke tuba ti yina kele kieleka, mpe nge lunga manga yawu ve. Na yawu yinki nge ke sala samu na Yawu?” Beno me mona, mutindu yina.

²⁶³ Mu tubaka, “Mpangi Best, mu ke tuba na nge yina ke Kieleka. Mpe kana mu me tuba kieleka, Nzambi ke siamisa kaka Kieleka.” Mu tubaka, “Kana Yandi kele ve. . . Kana Yandi ke siamisa Kieleka ve, na yawu Yandi ke Nzambi ve.” Mpe mu tubaka, “Mu ke belusaka bantu ve. Mu me butukaka na—na dikabu ya kumona bima, kumona yawu kusalama.” Mu tubaka, “Mu zaba ti bantu ke bakisaka munu mbote ve, kasi mu ke lungisa kaka kundima ya ntima ya munu.” Mu tubaka, “Mu ke kwikilaka ti Yesu Klisto vumbukaka na lufwa. Mpe kana Mpeve yina ke kwisaka mpe ke talisaka ba vision mpe nionso yina, kana ntembe kele samu na yawu, kwisa kuna mpe nge mona.” Mu tubaka, “Yimeni.” Kasi mu tubaka, “Kasi samu na munu mosi, mu lunga sala kima mosi ve na munu mosi.” Mpe mu tubaka, “Kana mu me tuba Kieleka, Nzambi ke vwanda kaka na munu, samu na kusala kimbangi ti Yawu ke Kieleka.”

²⁶⁴ Mpe pene na ntangu yina, Kima mosi salaka, “Wuuuussssh!” Yandi yina, ya kulumukaka kuna. Mpe Kimvuka ya Bakangi-foto ya Amérique, Studio Douglas ya Houston, na Texas, vwandaka na camera ya nene kuna (ya ke musiku na kukanga bafoto), bawu kangaka foto.

265 Na ntangu bawu vwandaka kuna samu na kukanga Tata Best bafoto, mpe yandi—yandi tubaka, na ntwala mu kwenda kuna, yandi tubaka, “Beno vingila fioti! Beno kanga munu bafoto sambanu awa!” Yandi tubaka, “Beto kwenda, beno kanga munu foto ntangu yayi!” Mpe yandi tulaka musapi ya yandi na mbombo ya kiboba ya bakala yina ya santu, mutindu yayi, yandi tubaka, “Ntangu yayi beno kanga munu foto!” Mpe bawu kangaka yawu. Na manima yandi kangaka dikofi mpe matisaka yawu na zulu, yandi tubaka, “Ntangu yayi beno kanga munu foto!” Mpe bawu kangaka yawu mutindu yina. Na manima yandi salaka mutindu yayi, yandi yilamaka samu na foto ya yandi. Yandi tubaka, “Beno ke mona yayi na magazine ya munu!” mutindu yina.

266 Mpangi Bosworth telemaka kuna mpe tubaka ata kima mosi ve. Na manima bawu kangaka foto ya Yayi.

267 Na kuvutuka na yinzo na nkokila yina, (mwana-bakala mosi ya Catholique bakaka yawu), yandi tubaka na mwana-bakala yina yankaka, yandi tubaka, “Yinki nge ke banza samu na Yina?”

268 Yandi tubaka, “Mu zaba ti mu me sawula yandi. Ti na ntangu goitre bikaka mungungu ya kento yina, mu tubaka ti yandi lokaka yandi.” Yandi tubaka, “Mu lenda vwanda na kifu samu na yawu.”

Yandi tubaka, “Yinki nge ke banza samu na foto yina?”

“Mu zaba ve.”

269 Bawu tulaka yawu na kati ya acide. Foto ya yandi yawu yayi, beno lunga yufula yandi kana beno me zola. Bawu vutukaka na yinzo, yandi vwandaka kuna mpe nwaka dikaya mosi. Yandi kotaka kuna mpe bendaka mosi ya Mpangi Bosworth, yawu vwandaka negatif. Yandi bendaka zole, tatu, yiya, tanu, sambanu, mpe nionso ya yawu vwandaka na kima ve. Nzambi pesaka muswa ve ti bawu kanga foto ya kiboba ya muntu ya Yandi ya santu yina telemaka kuna na muntu yina ya luvunu, na mbombo ya yandi, to diboko, ke ningisa yawu na nsi ya mbombo ya yandi mutindu yina. Yandi lendaka pesila yawu muswa ve.

270 Bawu bendaka mosi yina yankaka, mpe awa Yandi vwandaka kuna. Bakala yina kangamaka ntima, mutindu bawu tubaka, na nkokila yina.

271 Mpe bawu tindaka negatif yayi na Washington, DC. Bawu bumbaka yawu na musiku, bawu vutulaka yawu.

272 Mpe George J. Lacy, mfumu ya F.B.I. na kusalu ya bidimbu ya misapi mpe mikanda, mpe nionso yina, mosi ya bayayi me lutila na mayele na yinza ya muvimba, bawu natilaka yandi yawu mpe ya salaka na yawu bilumbu zole samu na kutala mbote-mbote camera, bansemo, bima nionso yankaka. Mpe na ntangu beto kwisaka na manima ya midi yina, yandi tubaka, “Reverend

Branham, mu sawulaka nge, mpe.” Yandi tubaka, “Mpe mu tubaka ti ya vwandaka psychologie, muntu mosi tubaka ti bawu monaka Bansemo mpe bima ya mutindu yina.” Mpe yandi tubaka, “Beno zaba, muntu ya luvunu ya nkulu vwandaka tuba ntangu nionso mutindu yina” (yandi zolaka tuba mumpani) “bafoto yina pene-pene, bafoto yina ya mpamba pene-pene ya Klisto, pene-pene ya basantu,’ yandi tubaka, ‘yina vwandaka kaka psychologie.’” Kasi yandi tubaka, “Reverend Branham, disu ke kangaka foto ya camera yayi lenda kanga psychologie ve! Nsemo bulaka tala-tala ya masini, to bulaka negatif, mpe Yandi vwandaka kuna.” Mpe yandi tubaka . . .

273 Mu pesaka bawu kiyeka yina. Yandi tubaka, “Oh, tata, nge zaba mfunu ya yawu?”

Mpe mu tubaka, “Samu na munu ve, mpangi-bakala, samu na munu ve.” Mpe na yawu yandi tubaka . . .

274 “Samu, ya ke sala ata fioti ve kima mosi na ntangu nge ke zinga, kasi kilumbu mosi, kana ntomosolo kukwenda na ntwala mpe Kimuklisto kele diaka, kima mosi ke salama samu na yayi.”

275 Na yawu, bankundi ya munu, na nkokila yayi, kana yayi ke lukutakanu ya beto ya nsuka na zulu ya ntoto yayi, beno na munu me vwanda na Ntwala ya Nzambi ya Ngolo nionso. Kimbangi ya munu kele ya kieleka. Bima mingi, mingi, yina ke lomba babuku mingi na kusonika yawu, kasi mu zola beno zaba.

276 Bantu yikwa awa na ntangu yayi, bayina me monaka ntete ve foto, kasi Nsemo Yawu mosi pene-pene na kisika mu vwanda longa? Beno telemisa maboko ya beno na zulu, bisika nionso na kati ya yinzo yayi, muntu nionso yina me monaka Yawu ntete. Beno me mona, pene-pene ya maboko nana to kumi kati na bayina me vwanda awa.

277 Beno ke tuba, “Bawu lenda—lenda mona Yawu mpe munu mona Yawu ve?” Yinga, tata.

278 Mbwetete yina—yina bantu yina ya ndwenga vwandaka landa, lutaka bisika nionso ba ke talaka yawu. Muntu mosi ve monaka Yawu kasi bawu kaka. Bawu kaka monaka Yawu.

279 Elie telemaka kuna ke tala bapusu-pusu nionso yina ya tiya, mpe bima yankaka nionso. Mpe Guéhazi talaka bisika nionso, yandi lendaka mona yawu ve. Nzambi tubaka, “Zibula meso ya yandi samu yandi mona.” Mpe na manima yandi monaka yawu, beno me mona. Kasi ya vwandaka mwana-bakala ya mbote, yina telemaka kuna ke tala bisika nionso, kasi yandi lendaka mona yawu ve. Ya kieleka. Muswa me pesama na bamosi na kumona, kasi bayankaka ve. Mpe yina ke kieleka.

280 Kasi ntangu yayi beno yina me monaka Yawu ata fioti ve, me monaka Yawu ata fioti ve, mpe beno yina me monaka Yawu na mesu ya beno ya kimuntu mpe me monaka ata fioti ve foto, mpamba ve bayina me monaka foto kele na kimbangi ya nene

kulutila bayina me monaka Yawu na mesu ya beno ya kimuntu. Samu beno, na meso ya kimuntu, lenda vwanda na kifu, meso ya beno lendaka vunama. Ya kieleka? Kasi Yina ke kuvunama ya meso ve, Yina ke Kieleka, mayele ya bantu me siamisa ti Yawu ke Kieleka. Na yawu Mfumu Yesu salaka yayi.

“Nge ke banza yinki Yawu kele,” beno ke tuba, “Mpangi Branham?”

²⁸¹ Mu ke kwikila ti Yawu kele Dikunzi ya Tiya mosi yina twadisaka bana ya Israel kubanda Egypte tii na Palestine. Mu ke kwikila ti Yawu ke Wanzio ya Nsemu mosi yina kotaka na—na boloko mpe kwisaka na Santu Pierre mpe simbaka yandi, mpe kwendaka kuna na ntuala mpe zibulaka kielo mpe basisaka yandi na nganda sika wapi nsemu vwandaka. Mpe mu ke kwikila ti Ya kele Yesu Klisto mutindu mosi mazono, bubu yayi, mpe kukonda nsuka. Amen! Yandi ke Yesu mosi yina Yandi vwandaka mazono. Yandi ke vwanda kaka Yesu ya kukonda nsuka.

²⁸² Mpe kaka na ntangu mu vwanda tubila Yawu, Nsemu yina mosi kele na foto kele na zulu. . . me telema na ba metres 0,6 ve na kisika yina mu me telema na ntangu yayi. Yina ke kieleka. Mu lunga mona Yawu ve na meso ya munu—ya munu, kasi mu zaba ti Ya me telema awa. Mu zaba ti Ya ke na kukota na kati ya munu na ntangu yayi. Oh! Kana beno lenda zaba luswaswanu na ntangu ngolo ya Nzambi ya Ngolo nionso ke kota na kisal, mpe wapi mutindu bima ke monika ya kuswaswanu!

²⁸³ Yina ke manisa ntembe, na muntu nionso. Mu vwanda na dibanza ve ya kusambila samu na bambevo, mu zolaka sala mbiekolo ya mbala zole. Kasi vision me vwanda kuna na zulu ya bantu. Uh-huh. Nzambi kuzaba yawu. Mu ke sala ve ndonga ya bisambu, mu ke bika beno kaka ya kuvwanda kuna. Bantu yikwa na kati ya beno kele na kalati ya bisambu ve? Beno talisa maboko ya beno, muntu yina ke na kalati ya bisambu ve, bayina ke na kalati ya bisambu ve.

²⁸⁴ Mama ya ndombe yina me vwanda awa, mu me mona nge na maboko ya nge na zulu. Ya kieleka? Telema kaka na mutindu ti mu lunga swasikisa nge na mwa ntangu fioti. Mu zaba ve yina Mpeve-Santu ke tuba, kasi nge ke tala munu na ntadilu mosi ya kieleka. Nge ke na kalati ya bisambu ve? Kana Nzambi ya Ngolo nionso lendaka monisa na munu pwelele yina kele mpasi ya nge. . . Mu ke sala yayi kaka samu na kubanda, samu kaka na kubanda. Nge ke ndima ti mu kele. . . Beno zaba ti kele na kima mosi ve. . . kele na kima ya mbote ve samu na munu. Kana nge kento ya makwela, mu ke kaka mutindu mosi na bakala ya nge kuyika ve. Mu ke kaka bakala. Kasi Yesu Klisto kele Mwana ya Nzambi, mpe Yandi tindaka Mpeve ya Yandi samu na siamisa bima yayi.

²⁸⁵ Kana Nzambi lenda tuba na munu yina ke tambula mbote ve na nge (mpe nge zaba ti kele na mutindu ve samu na munu

na kuvwanda na ngwisani na nge na mutindu nionso), nge ke kwikila na ntima ya nge ya muvimba? [Mpangi-kento me tuba diaka—Mu.] Nzambi sakumuna nge. Na yawu hypertension ya nge me bika nge. Yawu yina nge vwandaka na yawu. Ya kieleka ve? Na yawu vwanda.

²⁸⁶ Kwikila yawu ntete mbala mosi! Mu ke manisa ntembe ya muntu nionso na kukwikila Yawu.

²⁸⁷ Tala awa, bika mu tuba na nge kima mosi. Marthe, kwisaka na Mfumu Yesu. Dikabu yina fwanaka sala ata fioti ve. . . Kuna Tata talisaka na Yandi ntete yina Yandi ke sala. Yawu lendaka sala ata fioti ve. Kasi yandi tubaka, “Mfumu, munu. . . Kana Nge vwandaka awa, mpangi ya munu lendaka kufwa ve.” Yandi tubaka, “Kasi mu zaba ti yawu vwanda na ntangu yayi nionso Nge ke lomba na Nzambi, Nzambi ke pesa Nge yawu.”

²⁸⁸ Yandi tubaka, “Mu kele Mvumbukulu mpe Luzingu, yandi yina ke kwikila na Munu ata ti yandi me fwa, yandi ke zinga. Mpe yina nionso ke zinga mpe ke kwikila na Munu ke fwa ata fioti ve. Nge ke kwikila yayi?”

²⁸⁹ Beno wa yina yandi tubaka. Yandi tubaka, “Yinga, Mfumu. Mu ke kwikila ti bima nionso Nge me tuba kele ya Kieleka. Mu ke kwikila ti Nge ke Mwana ya Nzambi yina me kwisa na yinza.” Yina vwandaka mutindu ya yandi ya kukubama, na kukikulumusa nionso.

Nge ke wa mutindu yankaka, mutindu yina ve, mama? Yinga. Ya kieleka.

²⁹⁰ Mama yina ya fioti me vwanda kuna, yina ke pene-pene ya nge, yandi mpe, ke na mpasi ya arthritis mpe mpasi ya bakento. Ya kieleka ve, mama? Telema fioti, mama yina ya fioti yina me lwata robe ya mbwaki. Nge vwandaka pene-pene mingi, na mutindu ti vision me kwisa na munu. Arthritis, mpasi ya bakento. Ya kieleka? Mpe tala kima mosi na luzingu ya nge (nge ke—nge ke na ntadilu mosi ya kieleka): nge ke kukiyangisaka mingi na luzingu ya nge, mambu mingi. Mpe mpasi kele samu na cheri ya nge, yandi ke bakala ya nge. Yandi ke kinwa-malafu. Yandi ke zolaka ve kukwenda na yinzo-Nzambi. Kana ya kieleka, telemisa diboko ya nge. Nzambi sakumuna nge, mama. Vutuka na yinzo na ntangu yayi mpe yamba lusakumunu ya nge. Nge me beluka, nsemo ke pene-pene ya nge.

²⁹¹ Bakala yina me vwanda pene-pene ya yandi kuna. Nge, tata, nge ke kwikila? [Mpangi-bakala me tuba, “Yinga. Mu ke kwikila.”—Mu.] Na ntima ya nge ya muvimba? [“Yinga, tata.”] Nge me zimbisa mosi ya mayuki ya nge. Ya ke mayuki ya kuwila nsunga. Ya kieleka ve? Kana ya kieleka, pepa diboko ya nge. [“Ya kieleka.”] Tula diboko ya nge na zulu ya yinwa ya nge, mutindu yayi, tuba, “Mfumu Yesu, mu ke kwikila Nge na ntima ya munu ya muvimba.” [“Mfumu Yesu, mu ke kwikila Nge na ntima ya

munu ya muvimba.”] Nzambi sakumuna nge. Kwenda ntangu yayi. Nge ke kuzwa kubeluka ya nzutu ya nge.

²⁹² Kwikila na Nzambi! Yinki beno nionso ke banza samu na Yawu, kuna na manima? Beno ke kwikila? Beno vwanda na luzitu!

²⁹³ Kele na mama mosi yina me vwanda kuna na manima na nsongi. Mu ke mona Nsemo yina na zulu ya yandi. Yina ke mutindu mosi kaka mu lunga zaba mambu, na nzila ya Nsemo yina kele na zulu. Nsemo *yayi* kele na zulu ya mama yango. Mbala yankaka na muniti mosi, kana mu lunga mona yina yawu kele. Ya ke . . . Mama yango ke na mpasi ya—ya ntima. Yandi ke tala kaka na munu.

²⁹⁴ Mpe bakala ya yandi me vwanda pene-pene ya yandi. Mpe bakala ya yandi ke na kimbevo mosi, yandi vwandaka ya kubela, minianga, ya kubela. Ya kieleka ve, tata? Telemisa diboko ya nge na zulu kana ya kieleka. Ya kieleka, ya ke nge, mama, na kitambala kuna. Tata, ya kieleka ve? Nge vwandaka ve na mwa minianga bubu yayi? Nge ke na minianga na kati ya estomac, bakala. Ya kieleka.

²⁹⁵ Beno ke kwikila na ntima ya beno ya muvimba, beno zole? Nge ke ndima Yawu? Tata, mu ke tuba na nge, nge mpe, mu ke mona diboko ya nge na zulu, nge ke nwaka makaya. Bika kusala mutindu yina. Nge ke nwaka makaya ya nene, nge lenda sala mutindu yina ve, yawu ke pesa nge kimbevo. Ya kieleka ve? Kana ya ke mutindu yina, pepa diboko ya nge mutindu yayi. Yawu yina ke yangisa nge. Ya ke sala mpasi na misisa ya nge. Losa ntama kima yina ya mvindu mpe kusala yawu diaka ve, mpe nge ke beluka na yawu mpe nge ke kuma mbote, mpe mpasi ya ntima ya kento ya nge ke bika yandi. Nge ke kwikila yawu? Ya kieleka ve? Mu ke mona ti nge ke vwandaka awa ve, mpe nge zaba yawu, kasi nge ke na makaya ya minene na . . . na—na pokosi ya nge ya ntuala. Ya kieleka. Basisa bima yina mpe tetika diboko ya nge na zulu ya kento ya nge, tuba na Nzambi ti nge ke simba diaka ve bima ya mutindu yina, nge ke vutuka mbote na yinzo, nge na kento ya nge ke kuma mbote. Nkumbu ya Mfumu Yesu kusakumuka!

Nge ke kwikila na ntima ya nge ya muvimba?

²⁹⁶ Mama yayi ya fioti me vwanda awa ke tala munu awa. Nge na . . . kuna na kiti ya ntuala awa, yina me vwanda awa. Mama ya fioti na . . . ke tala munu, yina me vwanda kuna. Nge kele ve . . . Nge ke na kalati ya bisambu, mama, yayi awa? Nge ke na kalati ya bisambu ve? Nge ke kwikila na ntima ya nge ya muvimba? Nge ke kwikila ti Yesu Klisto lunga belusa nge?

²⁹⁷ Yinki nge ke banza samu na Yawu, nge yina me vwanda pene-pene ya yandi? Nge ke na kalati ya bisambu, mama? Nge ke na yawu ve? Nge zola beluka, mpe? Nge zola kwenda ve kudia diaka mutindu nge vwandaka kudia, kuvwanda diaka ve na mpasi ya

estomac? Nge ke kwikila ti Yesu me belusa nge na ntangu yayi? Telema kana nge ke kwikila ti Yesu Klisto me belusa nge. Nge vwandaka na mputa ya nene na estomac, mutindu yina ve? Ya ke samu nge ke na ntima ya nkufi. Nge ke vwandaka na ntima ya nkufi kubanda ntama. Mingi-mingi acide mpe bima, to mu zola tuba ya ke buta acide, mpe ke sala meno ya nge ngayi na ntangu nge ke vtutula madia na yinwa ya nge. Ya kieleka. Yinga, tata. Ya ke mputa ya nene na estomac, yawu vwandaka na nsi ya estomac ya nge. Ya ke salaka nge mpasi mingi-mingi na manima kudia dimpa ya kuyoka na manteka. Ya kieleka? Mu ke tanga mabanza ya nge ve, kasi Mpeve-Santu ke vwanda na kifu ve. Nge me beluka ntangu yayi. Kwenda na yinzo, vwanda na mavimpi ya mbote.

²⁹⁸ Na yawu beno kuna na lweka yayi? Bayankaka na kati ya beno kuna kele na kalati ya bisambu ve, beno telemisa maboko ya beno. Muntu yina kele na kalati ya bisambu ve. Mbote mingi, beno vwanda na luzitu, beno kwikila na ntima ya beno ya movimba. Ebuna beno kuna na balcon? Beno kwikila na Nzambi.

²⁹⁹ Mu lunga sala yayi na munu mosi ve, ya ke kaka lemvo ya Yandi ke na nsuka ve. Nge ke kwikila? Mu lunga tuba yawu kaka mutindu Yandi ke talisa yawu na munu. Mutindu lukwikilu ya nge. . . Mu ke tuba yawu samu na kuningisa lukwikilu ya nge, na manima mu ke tala yinki ndambu Yandi ke twadisa munu. Nge zaba ti yayi—yayi ke mpangi ya nge ve? Nge ke na Ntwala ya Yandi. Ya ke munu ve ke sala yayi, ya ke lukwikilu ya nge ke sala Yawu. Mu lunga sala Yawu ve. Ya ke lukwikilu ya nge ke sala yawu. Mu ke na mutindu ya kusala Yawu ve. Beno vingila fioti.

³⁰⁰ Na nsongi yayi mu ke mona bakala mosi ya ndombe yina me vwanda kuna, kasi kiboba, yandi me lwata maneti. Nge ke na kalati ya bisambu, tata? Telema mwa fioti. Nge ke kwikila ti mu ke kisadi ya Nzambi, na ntima ya nge ya movimba? Nge ke yindula muntu yankaka, mutindu yina ve? Kana ya kieleka, pepa diboko ya nge. Samu yawu ke munu ve, mpangi ya nge. Ntangu yayi, nge ke na kalati ya bisambu ve. Ya ke vwanda ve na mutindu ya kukota na ndonga, samu nge ke na kalati ya bisambu ve. Ntangu yayi, kana na kati ya beno kele na bayina kele na bakalati, beno telema ve—ve—ve, beno me mona, samu beno ke kuzwa siansi ya kukota na ndonga.

³⁰¹ Kasi mu ke mona Nsemo yina me vwanda na zulu ya yandi. Vision me kwisa ntete ve. Mu lenda belusa nge ve, mpangi-bakala, mu lenda ve. Nzambi kaka lenda sala yawu. Kasi ya nge. . . ya nge. . . nge ke na lukwikilu. Nge ke na kukwikila. Mpe kele na kima—kima mosi, yawu yina—yawu yina me sala yawu, na mutindu nionso.

³⁰² Kana Nzambi ya Ngolo nionso kutuba na bakala yayi yina ke mpasi ya yandi, beno bayankaka ke yamba kubeluka ya nzutu

ya beno? Tala muntu yayi, yandi me telema na bitamina kumi, to kumi na tanu na munu, mu me monaka yandi ata fioti ve na luzingu ya munu. Yandi ke kaka bakala mosi me telema kuna. Kana Nzambi ya Ngolo nionso kumonisa na munu pwelele yina ke tambula mbote ve na bakala yina, beno nionso ke basika awa na mavimpi ya mbote. Yinki Nzambi lenda sala diaka? Ya kieleka?

³⁰³ Tata, kele na kima ya yimbi ve samu na nge. Nge ke ya kulemba mingi, nge ke basika mwa mingi na mpimpa, ya ke prostate mpe nionso yina, kasi yawu yina ve ke mpasi ya nge. Mpasi ya nge kele samu na mwana ya nge ya bakala. Mpe mwana ya nge ya bakala kele na lupitalu mosi ya leta, mpe yandi ke na bumuntu zole. Ya kieleka? Pepa diboko ya nge kana ya kieleka. Yina ke kieleka na nionso.

³⁰⁴ Bantu yikwa ke kwikila ntangu yayi ti Yesu Klisto Mwana ya Nzambi me telema awa? Beto telema mpe beto pesa yandi nkembo mpe beto yamba kubeluka ya nzutu ya beto.

³⁰⁵ Nzambi ya Ngolo nionso, Yinto ya Luzingu, Mupesi ya dikabu nionso ya mbote, Nge kele awa, Mfumu Yesu Klisto ya mutindu mosi, mutindu mosi mazono, bubu yayi, mpe kukonda nsuka.

³⁰⁶ Mpe, Satana, nge me vuna bantu yayi ntangu ya yinda, basika kati ya bawu! Mu ke tuma nge na nzila ya Nzambi ya moyo Yina Kele awa na ntangu yayi na mutindu ya Dikunzi ya Tiya, bika bantu yayi! Mpe basika kati ya bawu, na Nkumbu ya Yesu Klisto!

³⁰⁷ Beno nionso telemisa maboko ya beno mpe beno pesa nkembo na Nzambi, mpe beno yamba kubeluka ya nzutu ya beno, beno nionso. [Dibuundu ke pesa nkembo na Nzambi—Mu.]



*MUTINDU WANZIO KWISAKA NA MUNU,
MPE LUTUMU YA YANDI KNG55-0117*

(How The Angel Came To Me, And His Commission)

Nsangu yayi ya Mpangi William Marrion Branham, kulongamaka na Kingelesi, na Kilumbu ya ntete na kilumbu ya 17 ya Ngonda ya ntete, na mvula 1955, na Lane Tech High School na Chicago, Illinois, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kituba basisamaka na buku mpe ba kabulaka yawu na Voice Of God Recordings.

KIKONGO-KITUBA

©2020 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org